

卷十六至十八詩

壬起至十三





重校正唐文粹卷第十六之上

吳興姚

詩壬 摠七十四首

古調歌篇五

知已九

仰荅韋司業垂訪五首 蕭穎士

博平鄭太守自廬山見訪卻之武陵立馬贈別 李白

攜新文詣張籍韓愈途中成 賈島

喜陳懿老自宛陵至示予新製三十餘篇 朱晝

延康吟 賈島

交友四

審交 孟郊

北極贈李觀 韓愈

荅友問 白居易

與馬異結交 盧仝

規誨四



鉉

纂

示孟郊 孟浩然

自誠 司空圖

誠貪 釋子蘭

杏園即席上同年 曹勣

紀贈五

讀張曲江詩集 釋皎然

上河陽李大夫 孟郊

奉贈張荊州 王昌齡

誅德上韋檢察 歐陽詹

贈崔從事鄭 孟郊

散逸七

漁父歌 李頎

紫谿翁歌 陸龜蒙

秋醉歌 張爲

襄陽歌 李白

散人歌 陸龜蒙

貽張旭 李頎

春日醉起言志 李白

俠少二

戲作花卿歌 杜甫

秦宮詩 李賀

登覽十五

望廬山瀑布二首

李白

望山

賈島

登金陵鳳凰臺

李白

登黃鶴樓

崔顥

登嶺望

許鼎

過華陰

王昌齡

早霽南樓

張說

奉和早霽南樓

趙冬曦

奉陪登南樓

尹恣

春遊南亭

韋應物

廬山謠寄盧侍御虛舟

李白

登南岳事畢謁司馬道士

張九齡

奉使登終南山

王灣

終南山望餘雪作

祖詠

勝槩二十八

桃源行

王維

桃源行

劉禹錫

洪州祈雨是日輒應賦詩

張九齡

和登會稽山

孫逖

敬荅田徵君

宋之問

寄贈宋十一

田遊巖

宣城清溪二首

李白

龍門八詠

劉長卿

入崖口五渡寄李適

宋之問

和崖口五渡

徐彥伯

初至崖口

宋之問

山中作

顧況

輞口遇雨憶終南山

裴迪

峇裴迪

王維

出青門往南山下別業

薛據

夜歸鹿門歌

孟浩然

春泛若耶

蔡母潛

荆山獨往

姚係

歸四明

胡幽貞

尋西山隱者不遇

丘爲

仰峇章司業垂訪五首

蕭穎士

呦呦食苹鹿常飲清泠川但悅豐草美寧知牢饌鮮主人有幽意
將以充林泉眾網幸免傷蒙君復羈牽高堂列衆賓廣坐鳴清弦
俯仰轉驚惕徘徊獨憂煎緬懷雲巘路欲往無由緣物各有所好
違之傷自然

神龜在南國緬邈湘川陰遊止蓮葉上歲時嘉樹林毒蟲且不近
斤斧何由尋錯落負奇文熒煌耀丹金山萬里餘淮海阻且深
獨保貞素質不爲寒暑侵一逢盛明代應見通靈心

晉代有儒臣當年富辭藻立言寄青史將以贊王道遼落緬歲時

辛勤歷江島且言風波倦探涉豈爲寶不遇庾征西云誰展懷抱
士貧乏知已安得成所好

彭陽昔游說願謁南郢都王果尚未達况從夷節謨豈知晉叔譽
無罪嬰囚拘臨難俟解紛獨知祁大夫舉讎且不棄何必論親踈
夫子覺者也其能遺我乎

關西一公子年貌獨青春被褐來上京翳然聲未振中郎何爲者
倒屣驚座賓詞賦豈不佳盛名亦相因爲君奏此曲此曲多苦辛
千載不可誣孰言今無人

博平鄭太守自廬山千里相尋入江夏北市門見訪卻

之武陵立馬贈別

李白

大梁貴公子氣蓋蒼梧雲若無三千客誰道信陵君救趙復存魏
英威天下聞邯鄲能屈節博訪從毛薛夷門得隱淪而與侯生親
仍要鼓刀者乃是袖鋌人好士不盡心何能保其身多君重然諾
意氣遙相託五馬入市門金鞍照城郭都忘虎竹貴且與荷衣樂

去去桃花源何時見歸軒相思終無極腸斷朗陵猿

攜新文詣張籍韓愈途中成

賈島

袖有新成詩欲見張韓老青竹未生翼一步萬里道仰望青冥天
雲雪壓我腦失却終南山惆悵滿懷抱安得西北風身願變蓬草
地祇聞此語突出驚我倒

喜陳懿老自死陵至示予新製三十餘篇

朱書

一別一千日一日十二憶苦心無閑時今夕見王色王色復何異
紅明含群德有文如星宿飛入我曾臆憂愁方破懷懽喜重補塞
使我心兒全且非黃金力將攀下風手願假僊鸞翼詩人
孟郊故寄誠
齋章

延康吟

賈島

寄居延壽里為與延康隣不愛延康里愛此里中人人非十年故
人非九族親人有不朽語得之烟山春

審交

孟郊

種樹須擇地惡土變木根結交若失人中道生謗言君子芳桂性
春濃寒更繁小人槿花心朝在夕不存莫躡冬冰堅中有潛浪翻
唯當金石交可與賢達論

荅友問

白居易

大圭廉不割利劔用不缺當其斬馬時良玉不如鐵置鐵在洪鑪
鐵銷易如雪良玉同其中三日燒不熱君疑才與德誅此知優劣

北極贈李觀

韓愈

北極有羈羽南溟有沉鱗川源浩浩隔影響兩無因風雲一朝會
變化成一身誰言道理遠感激疾如神我年二十五求友昧其人
哀歌西京市乃與夫子親所向苟同趣賢愚豈異倫方爲金石姿
萬世無緇磷無爲兒女態惟悴悲賤貧

與馬異結交

盧仝

天地日月如等閑盧仝四十無往還唯有一片心脾胃骨巉巉摧萃
碑兀鬱律刀劔爲鋒鏑平地放著高如崑崙山天不容地不受日

月不敢偷照耀伏羲畫八卦鑿破天心曾女媧伏羲妹恐天怒擣
鍊五色石引日月之針五星之縷把天補補了三日不肯歸壻家
走向日中放老鷄月裏栽桂養蝦蟇天公發怒化龍蛇此龍此蛇
得死病神農合藥救死命天怪神農黨龍蛇罰神農爲牛頭令載
元氣車不知藥中有毒藥藥殺元氣天不覺爾來天地不神聖日
月之光無定正不知元氣元不死忽聞空中喚馬異馬異若不是
祥瑞空中敢道不容易昨日全不同異自異是謂大同而小異今
日全自同異不異是謂同不往兮異不至直當中兮動天地白玉
璞裏斲出相思心黃金鑪裏鑄出相思淚忽聞空中崩崖倒谷聲
絕勝明珠千萬斛買得西施南威一雙婢此婢嬌饒惱殺人凝脂
爲膚翡翠裙唯解畫眉朱點唇自從獲得君敲金撥玉凌浮雲却
返顧一雙婢子何足云平生結交苦少人憶君眼前如見君青雲
欲開白日沒天眼不見此竒骨縱橫竒又竒千歲萬歲枯松枝半
折半殘壓山谷盤根蹙節成蛟螭忽雷霹靂卒風暴雨撼不動欲

動不動千變萬化揔是鱗皴皮此竒怪物不可欺盧仝見馬異文章酌得馬異心中事風姿骨木恰如此是不是寄一字

示孟郊

孟浩然

蔓草蔽極野蘭枝結孤根衆音何其繁伯牙獨不喧當時高深意舉世無能分鍾期一見知山水千秋聞爾其保靜節薄俗徒云云

自誠

司空圖

我祖銘座右嘉謀詒厥孫勤此苟不怠令名日可存媒衞士所恥慈儉道所尊松柏豈不茂桃李亦自繁衆人皆察察而我獨昏昏取訓於老氏大辯欲訥言

誠貪

釋子蘭

多求待心足未足旋傾覆明知貪者心求榮不求辱

杏園即席上同年

曹鄴

岐路不在天十年行不至一旦公道開青雲在平地枕上數聲鼓衡門已如市白日探得珠不待驪龍睡念念出九衢僮僕顏色異

故衣未及換尚有去年淚晴陽照花影落絮浮野翠對酒時忽驚
猶疑夢中事自憐孤飛鳥得接鸞鳳翅永懷共濟心莫起胡越意

讀張曲江詩集

釋皎然

相公乃天啓人文佐生成立程正頽靡繹思何縱橫春杼弄細綺
陽林敷玉英飄然飛動姿邈矣高簡情後輩驚失步前脩敢爭衡
始欣耳目遠再使幾慮清體正力已全理精識何妙昔年歌陽春
徒推郢中調今朝聽鸞鳳豈獨蘇門嘯帝命鎮雄州詩流據上游
才兼荆衡秀氣助瀟湘秋逸蕩子山匹經竒文暢雋沉吟未終卷
變態紛難數耀耳代明璫襲衣比芳杜悵悵聞玉聲寤寐在靈府

上河陽李大夫

孟郊

上將秉神略至兵無血威三軍向嚴冬一撫勝重衣寒劒奪衆景
夜星失長暉蒼鷹獨立時惡鳥不敢飛武牢鑱天關河橋紐地機
大軍奚與安守此稱者稀貧士少顏色貴門多輕肥試登山嶽高
始見草木微山嶽恩旣廣草木心皆歸

奉贈張荊州

王昌齡

祝融之峯紫雲銜翠如何其雲嶺岳邑西有路緣石壁我欲從之
卧穹嵌魚有心兮脫網罟江無人兮鳴楓杉王君飛鳥仍未去蘇
耽宅中意遙緘

詠德上韋檢察

即韋相公之弟也

歐陽詹

少華類太華太室似少室亞相與丞相亦復無異質亭如月臨水
肅若松照日輝影互光澄陰森兩葱鬱連枝鸞鳳下同氣龜龍出
併力革夷心通籌整師律英豪願迴席蠻貊皆屈膝中外佇分途
寰瀛待清謚

贈崔從事郎

孟郊

古人留清風千載遥贈君破松見貞心裂竹看直文殘月色不改
高賢德常新家懷詩書富宅抱草木貧安排一蹄泉未化千尺鱗
含意未不語釣璜幽水濱

漁父歌

李頎

白頭何老人蓑笠蔽其身避世常不仕釣魚清江濱浦沙明濯足
山月靜垂綸寓宿湍與瀨行歌秋復春持竿湘岸竹爨火蘆洲薪
淥水飯香稻青荷包紫鱗於中還自樂所欲全吾真而笑獨醒者
臨流多苦辛

紫谿翁歌

并序

陸龜蒙

紫谿翁過甫里先生舉酒相屬醉而歌曰
一丘之木其栖深也屋吾容不辱一谿之石其居平也席吾勞以
息一竇之泉其音清也弦吾方在懸得乎人得乎天吾不知所以
然而然先生弁而賡之曰采江之魚兮朝船有鱸采江之蔬兮暮
筐有蒲左圖且書右瑟與壺壽歟天歟貴歟賤歟歌闋而去

秋醉歌

張爲

金風颯已起還是招漁翁攜酒天姥岑自彈嶧陽桐脫却登山屐
赤脚翹青筇泉聲掃殘暑猿臂攀長松翠微泛樽綠苔蘚分煙紅
造化處術內相對數壺空醉眠嶺上草不覺夜露濃一夢到天曉

始覺一醉中皎然夢中路直到瀛洲東初平把我臂相與騎白龍
三留對上帝上樓十二重上帝賜我酒送我敲金鐘寶閣香斂葺
琪樹寒玲瓏動葉如笙篴音律相怡融珍重此一醉百骸出天地
長如此夢魂永謝名與利

襄陽歌

李白

落日欲沒岷山西倒著接籬花下迷襄陽小兒齊拍手攔街爭唱
白銅堤傍人借問笑何事笑殺山公醉似泥鸕鷀杓鸚鵡盃百年
三萬六千日一日須傾三百杯遙看漢水鴨頭綠恰似蒲萄初醱
醅此江若變作春酒壘麴便築糟丘臺金鞍駿馬換小妾笑坐金
鞍歌落梅車傍側挂一壺酒鳳笙龍管行相催咸陽市上嘆黃犬
何如月下傾金壘君不見晉朝羊公一片石龜龍剝落生莓苔淚
亦不能爲之墮心亦不能爲之哀清風朗月不用一錢買玉山自
倒非人推舒州杓力士鎗李白與爾同死生襄王雲雨今安在江
水東流螻蛄夜聲

散人歌

陸龜蒙

江湖散人天骨竒短髮搔來蓬半垂手促孤篁曳寒繭口誦太古
滄浪詞詞云太古萬萬古民性甚壘踏無風期夜棲正與禽獸雜
獨自構架縱橫枝因而稱曰有巢氏民共敬貴如君師當時只效
烏鵲輩豈是有意陳尊卑無端後聖穿鑿破一派前導千流隨多
方惱亂元氣死日使父子生姦欺聖人事業轉消耗尚有漁者存
熙熙風波不獨因一士凡百器用皆能施眾疏扈腐鱸鰕脫止失
檢馭無讒疵人間所謂好男子我見婦女留須眉奴顏婢膝真乞
丐反以正直爲狂癡所以頭欲散不散弁我巍所以腰欲散不散
佩陸離行散任之適坐散從傾歌語散空谷應笑散春容披衣散
單複便食散酸鹹宜書散混真草酒散甘醇醅屋散勢斜直樹散
行參差客散忘簪屨禽散空籠池外物一以散中心散何疑不共
諸侯分邑里不與天子專隍陴靜則守桑柘亂則逃妻兒金鑣納
未嘗識白刃殺我窮生爲或聞蕃將負恩澤號令鐵馬如風馳

大君年小丞相少當軸自請都旌旗神鋒悉出羽林仗繪畫日月
蟠龍螭太宗基業甚牢固小醜背叛當殲夷禁軍近自肅宗署抑
遏輔國爭雄雌必然大段剪兇逆須召勁勇扶軍麾四方賊壘猶
占地死者暴骨生寒飢歸來輒擬荷鋤笠詎吏已責租錢遲興師
十萬一日費不啻千金何以支祇今利口且箕歛何暇俛首哀惻
髮均荒補敗豈無術布在方策撐頽戲冰霜襦袴易反掌白面諸
郎殊不知江湖散人悲古道悠悠幸寄羲皇傲官家未議活蒼生
拜賜江湖散人號

貽張旭

李頎

張公性嗜酒豁達無所營皓首窮草隸時稱太湖精露頂據胡牀
長叫三五聲興來洒素壁揮筆如流星下舍風蕭條寒草滿戶庭
問家何所有生事如浮萍左手持蟹螯右手執丹經瞪目視霄漢
不知醉與醒諸賓且方坐旭日臨東城荷葉裹江魚白甌貯香粳
微祿心不泄放神於八紘時人不識者即是安期生

春日醉起言志

李白

處世若大夢胡為勞其生所以終日醉頽然卧前楹覺來盼庭前一鳥花間鳴借問此何時春風語流鶯感之欲嘆息對酒還自傾浩歌待明月曲盡已忘情

戲作花卿歌

杜甫

成都猛將有花卿學語小兒知姓名用如快鶻風火生見賊唯多身始輕縣州副使著拓黃我卿掃除即日平子章髑髏血糝糊手提擲還崔大夫李侯重有此節度人道我卿絕世無既稱絕世無天子何不喚取守京都

秦宮詩

并序

李賀

秦宮漢將軍梁冀之嬖奴也秦宮得寵內舍故以驕名大譟於人予撫舊而作辭似與憑子都之事相為對望又欲二其昔有之詩越羅夾衫迎春風玉刻麒麟腰帶紅樓頭曲宴仙人語帳底吹笙煙霧濃人間酒暖春茫茫花枝入簾白日長飛窓複道傳籌飲午

夜朦朧膩燭黃禿襟小袖調鸚鵡紫繡麻遐踏虢虎斫桂燒金待
曉筵白鹿清蘇夜來煮桐英永巷騎主馬內屋珍屏生色畫開門
爛用水衡錢卷起黃河向身瀉皇天厄運猶曾裂秦宮一生花裏
活鸞篋奪得不還人醉卧甕能滿堂月

望廬山瀑布泉二首

李白

西登香爐峰南見瀑布水挂流三百丈噴壑數千里歛如飛電來
隱若白虹起初驚河漢落半灑雲天裏仰觀勢轉雄壯哉造化功
海風吹不斷江月照還空空中亂溲射左右洗青壁飛珠散輕霞
流沫沸穹石而我遊名山對之心益閑且諧宿所好永願辭人間
日照香鑪生紫煙遙看瀑布挂長川飛流直下三千尺疑是銀河
落九天

望山

賈島

南山三十里不見踰一旬冒雨時立望望之如明親虬龍一掬波
洗蕩千萬春日雨不斷愁殺望山人天事不可長勁風來如奔

陰崖一已掃浩翠寫國門長安百萬家家張屏新誰家最好山
我願爲其隣

登金陵鳳凰臺

李白

鳳凰臺上鳳凰遊鳳去臺空江自流吳時花草埋幽徑晉國衣冠
成古丘三山半落青天外二水中分白鷺洲揔爲浮雲能蔽日長
安不見使人愁

登黃鶴樓

崔顥

昔人已乘白雲去此地空餘黃鶴樓黃鶴一去不復返白雲千載
空悠悠晴川歷歷漢陽樹春草青青鸚鵡洲日暮鄉關何處是煙
波江上使人愁

登嶺望

許鼎

森森三江水悠悠五嶺關鴈飛猶不度人去若爲還

過華陰

王昌齡

雲起太華山雲山互明滅東峯始含景了了見松雪羈人感幽樓

宵映轉奇絕欣然忘所疲永望吟不輟信宿百餘里出關玩新月
何意昨暝暝遇物遂遷別人生屢如此何以肆愉悅

早霽南樓

張說

山水佳新霽南樓玩初旭夜來枝半紅雨後洲全綠四運相終始
萬形紛代續適臨青草湖再變黃鸝曲地穴穿東武江流下西蜀
歌聞枉渚邇舞見長沙促心遠居無陋神和生自足白髮悲上春
知常謝先欲

奉和早霽南樓

趙冬曦

閑曙躋南樓凭軒四遐矚物華蕩暄氣春景媚晴旭川霽湘山孤
林芳楚郊縹列巖重壘翠遠岸逶迤綠風帆摩天垠漁艇散灣曲
鴻歸鷁舞送猿叫鷲斷續羣動皆熙熙噫予獨羈束常欽才子義
忌鵬傷蹠跼雅尚騷人文懷沙何迫促未知二賢意去矣從所欲

奉陪登南樓

尹忭

君子每垂眷江山共流眄水遠林外明巖近霧中見終日西北望

何處是京縣屢登高春臺徒使淚如霰

春遊南亭

韋應物

川明氣已變巖寒雪尚擁南亭草心綠春塘泉脉動景照聽禽響
雨餘看柳重逍遙池館華益愧專城寵

廬山謠寄盧侍御虛舟

李白

我本楚狂人鳳歌笑孔丘手持綠玉杖朝別黃鶴樓五岳尋仙不
辭遠一生好入名山遊廬山秀出南斗傍屏風九疊雲錦張影落
明湖青黛光金闕前開二峯長銀河倒瀉三石梁香爐瀑布遙相
望迴崖沓嶂凌蒼蒼翠影紅霞映朝日鳥飛不到吳天長登高壯
觀天地間大江茫茫去不還黃雲萬里動風色白波九道流雪山
好爲廬山謠興因廬山發閑窺石鏡清我心謝公行處蒼苔沒早
服還丹無世情琴心三疊道初成遙見仙人綵雲裏手把芙蓉朝
玉京先期汗漫九垓上願接盧敖遊太清

登南岳事畢謁司馬道士

張九齡

將命祈靈岳迴策詣眞士絕跡尋一徑異香聞數里分庭八桂樹
蕭容兩童子入室希把袖登牀願啓齒誘我棄智詠迨茲長生理
吸精反自然鍊藥求不死斯言眇霄漢顧予嬰紛滓相去九牛毛
慙嘆荷知已

奉使登終南山

王灣

常愛南山遊因而盡原隰數朝至林嶺百仞登鬼岌石壯馬徑窮
苔色步緣入物竒春狀改氣遠天香集虛洞策杖鳴低雲拂衣濕
倚巖見廬舍人戶欣拜揖問性矜勤勞示心教澄習玉英時共飲
芝草爲余拾境絕人不行潭深鳥空立一乘從此受九轉兼是給
辭處若輕飛憇來唯吐吸閑襟超已勝迴路倏而及煙色松上深
水流山下急漸平逢車騎向晚睨城邑峯在野趣繁塵飄宦情緝
辛苦久爲吏勞生何妄執日暮懷此山悠然賦斯什

終南山望餘雪作

祖詠

終南陰嶺秀積雪浮雲端林表明霽色城中增暮寒

桃源行

劉禹錫

漁舟何招招浮在武陵水
拖綸擲餌信流去誤入花源行數里清
源尋盡花緜緜踏花覓徑至洞前
洞門蒼暗煙霧生暗行數步逢
虛明俗人毛骨驚仙子爭來致詞何至此
須臾皆破冰雪顏笑言委曲問世間
因嗟隱身來種王不知人世如風燭
筵羞石髓勸客殮燈藝松脂留客宿
雞聲犬聲遙相聞曉光葱蘢開五雲
漁人振衣起出戶滿庭無路花紛紛
翻然恐失鄉縣處一息不肯桃源往
桃源滿溪水似鏡塵心如垢洗不去
仙家一出尋無蹤至今流水山重重

桃源行

時年十九

王維

漁舟逐水愛山春兩岸桃花夾古津
坐看紅樹不知遠行盡清溪忽值人
山口潛行始隈隩山開曠望旋平陸
遙看一處攢雲樹近入千家散花竹
樵客初傳漢姓名居人未改秦衣服
居人共住武陵源還從物外起田園
月明松下房櫳靜日出雲中雞犬喧
驚聞

俗客爭來集競引還家問都邑平明閭巷掃花開薄暮漁樵乘水
入初因避地去人間及至成仙去不還峽裏誰知有人事世中遙
望空雲山不疑雲境難聞見塵心未盡思鄉縣出洞無論隔山水
辭家終擬長遊行自謂經過舊不迷安知峯壑今來變常時只記
入山深青溪幾度到雲林春來遍是桃花水不辨仙源何處尋

和登會稽山

孫逖

稽山碧湖上勢入東溟盡煙景晝清明九峯爭隱嶙望中厭朱紱
俗內採玄牝野老聽鳴騶山童擁行軫仙花寒未落古蔓柔堪引
竹澗入霜多松崖向天近雲從海人去日就江村隕能賦丘嘗聞
和歌參不敏冥搜信沖漠多士期標準願奉濯纓心長謠反招隱

洪州西山祈雨是日輒應賦詩言事

張九齡

茲山蘊靈異走望良有歸丘禱雖已久吐心難重違遲明申藻薦
先夕旅巖扉獨宿雲峯下蕭條人吏稀我來不外適幽抱自中微
靜入風泉奏涼生松栝圍窮年滯遠想寸晷閱清暉虛美悵無屬

素情緘所依詭隨嫌弱操羈束謝貞肥義濟亦吾道誠存爲物祈

贈荅弘農青巖曲有盤石可坐宋十一每拂拭待余寄

詩贈之云

田遊巖

信彼稱靈石居然狎遁棲徘徊承翠巘斌駁帶深溪夕陰起層岫
清景半虹蜺風來應嘯阮波渡可琴嵇僕之穎陽客望彼空思齊
儻見山人至筵蒿且杖藜

敬荅田徵君

宋之問

家臨清溪水溪水繞盤石綠蘿四面垂裏裏百餘尺風泉度絲管
苔蘚鋪茵席傳聞潁陽人霞外漱靈液忽在巖中翰吟卧朝復夕
何當遂遠遊物色候逋客

龍門八詠

劉長卿

闕口

秋山向搖落秋水急波瀾獨見魚龍氣長令煙雨寒誰窮造化力
空向兩崖看

水西渡

伊水搖鏡光纖鱗如不隔
千龕道傍古一鳥沙上白
何事還山雲能留向城客

水東渡

山葉傍崖赤千峯秋色多
夜泉發清響寒渚生微波
稍見沙月上歸人爭渡河

福公塔

寂寞對伊水經行長未還
東流自朝暮千載空雲山
誰見白鷗鳥無心洲渚間

遠公龕

松路向精舍花龕歸老僧
閒雲揚錫杖落日低金繩
入夜翠微裏千峯明一燈

石樓

隱隱見花閣隔河映青林
水田秋鴈下山寺夜鐘深
寂寞羣動息

風泉清道心

渡水

日暮下山來
千山暮鐘發
不如波上棹
還弄山中月
伊水連白雲
東南遠明滅

下山

誰識往來意
孤雲長自閒
風寒未渡水
日暮更看山
木落衆峯出
龍宮蒼翠間

宣城清溪二首

李白

清谿清我心
水色異諸水
借問新安江
見底何如此
人行明鏡中
鳥度屏風裏
向曉猩猩啼
空悲遠遊子
清谿勝桐廬
水木有佳色
山貌日高古
石容天傾側
綵鳥昔未名
白猿初相識
不見同懷人
對之空嘆息

入崖口五渡寄李適

宋之問

抱琴登絕壑
棧木沂清川
路極意謂盡
勢迴趣轉懸
人遠草木秀

山深雲景鮮，余負海岳情。自昔微尚然，彌曠十餘載。今來宛仍全，未窺仙源極。獨進野人船，時攀乳竇憇。屢薄天窓眠，夜弦響松月。朝檝弄苔泉，因冥象外理。永謝區中緣，碧潭可遺老。丹砂堪學仙，莫使馳光暮。空令歸鶴憐。

荅宋十一崖口五渡見贈

李適

聞君訪遠山，躋險造幽絕。眇然青雲境，觀竒彌年月。登嶺亦泝谿，孤舟事泐越。寧嶂傳彩翠，崖磴互欹缺。石林上攢叢，金澗下明滅。捫壁窺丹井，梯苔瞰乳穴。忽枉巖中贈，對翫未嘗輟。殷勤獨往事，委曲鍊藥說。邀余名山嵌，從爾泛海滙。歲晏秉宿心，斯言非徒設。

和崖口五渡

徐彥伯

聞有獨往客，拂衣捐世心。結忻薄枉渚，撰念縈舊林。經亘去崖合，冥絲歸壑深。琪樹環碧彩，金潭生翠陰。洄泐弄沙榜，詭仄眺明岑。夕聞桂裏猿，曉翫松上禽。雜佩蘊孤袖，瓊敷綴雙衿。我懷滄洲想，懿爾白雲吟。秉願理方叶，存期跡易尋。茲言庶不負，爲報巖中琴。

初至崖口

宋之問

崖口衆山斷，嶽峯聳天壁。氣衝落日紅，影入春潭碧。錦繡織苔蘚，丹青畫松石。水禽泛容與，巖花飛的皪。微路從此深，我來限于役。惆悵情未已，羣峯黯將夕。

山中作

顧況

野人愛向山中宿，況在葛洪丹井西。庭前有箇長松樹，夜坐子規來上啼。

輞口遇雨憶終南山

裴迪

積雨晦空曲，平沙滅浮彩。輞水去悠悠，南山復何在。

答裴迪

王維

森森寒流廣，蒼蒼秋雨晦。君問終南山，心向白雲外。

出青門往南山下別業

薛據

舊業在南山，夙駕自城闕。榛莽相蔽虧，去爾漸超忽。散漫餘雪晴，蒼茫季冬月。寒風吹長林，白日原上沒。懷抱曠早申，相知阻胡越。

弱年好棲隱鍊藥在巖窟及此離垢氛興來亦因物末路期赤松
斯言庶不伐

夜歸鹿門歌

孟浩然

山寺鳴鐘晝已昏魚梁渡頭爭渡喧人隨沙道向江村予亦乘舟
歸鹿門鹿門煙月照中樹忽到龐公樓隱處巉扉松徑長寂寥唯
有幽人自來去

春泛若耶

綦母潛

幽意無斷絕此去隨所偶晚風吹行舟花路入谿口際夜轉西壑
隔山望南斗潭煙飛溶溶林月低向後生事且彌漫願為持竿叟

荆山獨往

姚係

宿昔山水上抱琴聊躑躅山遠去難窮琴悲多斷續崑重丹陽樹
泉咽聞陰谷時下白雲中滄留秋水曲秋水石欄深潺湲如噴玉
雜芳被陰岸墜露方消綠恣此平生懷獨遊還自足

歸四明

胡幽貞

海色連四明仙舟去容易天籍豈輒問不是卑朝士

尋西山隱者不遇

丘為

絕頂一茅茨直上三十里扣關無僮僕窺室唯桸几若非巾柴車
應是釣秋水差池不相見僂俛空仰止草色新雨中松聲晚窻裏
及茲契幽絕自足盪心耳雖無賓主意頗得清淨理興盡方下山
何必待之子

重校正唐文粹卷第十六上

重校正唐文粹卷第十六下

吳興姚

鉉

纂

詩癸 摠四十四首

古調歌篇六

幽居十二

百丈谿讀書閻防家叔徵君東谿草堂二首盧象

寒食陸渾別業宋之問

題東谿公幽居李白

宿裴有書齋李觀訓暉上人夏日林泉見贈陳子昂

贈宣州元處士杜牧東溪翫月王昌齡

太白東谿張老舍即事寄舍弟姪等岑參

長安秋夕戎昱貽池陽谷口元贊善李端

山居十三

宿裴氏山莊王昌齡山中作沈千運入山寄城中故人韋

獨遊王昌齡過張邨鄆莊姚合宿王昌齡隱居常建

訪陸羽處士

然釋皎然初春 王績

南苑謝郡客留贈字文中丞

暢當

村居

沈亞之

贈劉藍田

王維退居 孟郊

渭川田家 王維

傷嘆十九

秦中吟十首

白居易憫農 李紳

石壕吏

杜甫

辛苦吟

于濶田家詞 元稹

傷田家

聶夷中

採玉行

韋應物茶山作 素高

野老歌

張籍

野行

姚合

百丈谿新理茅茨讀書

閻防

浪迹棄人世還山自幽獨始傍巢由蹤吾其獲心曲荒庭何所有
老樹半空腹秋蛩鳴北林暮鳥穿我屋栖遲樂遵渚恬曠寡所欲
開卦推盈虛散帙攻節目養閑度人事逢命知止足不學東國儒
俟時勞伐輻

家叔徵君東谿草堂二首

盧象

關山十餘里青壁森相倚欲識堯時天東谿白雲是雷聲轉幽壑
雲氣香流水澗影生蟲蛇巖端翳杞梓大道終不易君恩曷能已
鶴羨無老時龜言攝生理浮年笑六甲元化潛一指未暇掃雲梯
空慙阮家子

今朝共遊者得性閑未歸已到仙人家莫驚鷗鳥飛水深巖公釣
松挂巢父衣雲氣轉幽寂谿流無是非名理未足羨腥臊詎所稀
自惟負貞意何歲當食薇

寒食陸渾別業

宋之問

洛陽城裏花如雪陸渾山中今始發旦別河橋楊柳風夕卧伊川
桃李月伊川桃李正芳新寒食山中酒復春野老不知堯舜力酣
歌一曲太平人

題東谿公幽居

李白

杜陵賢人清且廉東谿卜築歲將淹宅近青山同謝眺門垂碧柳
似陶潛好鳥迎春歌後院飛花送酒舞前簷客到但知留一醉盤

中只有水精鹽

宿裴有書齋

李觀

卧君山窻下山鳥與我言清風何颼颼松柏中夜繁久遊失歸趣
宿此似故園林煙橫近郊谿月落古原稚子不待曉花間出柴門

訓暉上人夏日林泉見贈

陳子昂

聞道白雲居窈窕青蓮宇巖前萬丈流樹石千年古林卧對軒窻
山陰滿庭戶方釋塵中事從君襲蘭杜

贈宣州元處士

杜牧

陵陽北郭隱身世兩忘者蓬蒿三畝居寬於一天下罇酒對不酌
默與玄相話人生自不足愛嘆遭逢寡

東谿玩月

王昌齡

月從斷山口遥吐柴門端萬木紛空霽流陰中夜攢光連虛象白
氣與風露寒谷靜秋泉響巖深青靄殘澄清入幽夢影破抱空巒
恍忽琴窻裏松谿曉思難

太白東谿張老舍即事寄弟姪等

岑參

渭上秋雨過北風暮騷騷天晴諸山出太白峯最高主人東谿老
兩耳生長毫遠近知百歲子孫皆二毛中庭井欄上一架獼猴桃
石泉飯香杭酒瓮開新糟愛茲田中趣始悟世上勞我行有勝事
書此寄爾曹

長安秋夕

戎昱

八月更漏長愁人起常早閉門寂無事滿地生秋草昨宵西窻夢
先入荆門道遠客歸去來在家貧亦好

貽池陽谷口元贊善

李端

入谷逢君來秋泉已難涉林間人獨坐月下山相接重露濕蒼苔
明燈照黃葉故交一不見素髮何稠疊

宿裴氏山莊

王昌齡

蒼蒼竹林暮吾亦知所投靜坐山齋月清谿聞遠流西峯下微雨
向晚白雲收遂解塵中組終南春可遊

山中作

沈千運

棲隱別無事所願早離塵不辭城邑遊禮樂拘束人邇來歸山林
庶事皆吾身何者為形骸誰是智與仁寂寞了閑事然後知天真
咳唾驚榮華迂俯相屈伸如何巢與由天子不得臣

入山寄城中故人

王維

中歲頗好道晚家南山垂興來每獨往勝事空自知行到水窮處
坐看雲起時偶然值林叟談笑無迴期

獨遊

王昌齡

林卧情每閑獨遊景常晏時從灞陵下垂釣往南澗手攜雙白魚
目送千里薦悟彼飛有適知此雁憂患放之清泠泉因得省踈慢
未惟素岑客迴首白雲間神超物無違豈繫名與宦

過張邯鄲莊

姚合

客行長似病煩熱攻四肢到君讀書堂忽若逢良醫堂前水交流
堂下樹交枝雨門延風涼洗我昏濁肌與子還往熟行坐恣所宜

時時相獻酬文字當酒卮野飯且藜藿衣日亦不飢苟餐非其所
鱸炙爲蒺藜時清士人閑耕者唯文詞豈獨鄉里薦當取四海知

宿王昌齡隱居

常建

青溪深不測隱處唯孤雲松際露微月清光猶爲君茅亭宿花鳥
藥院滋苔紋余亦謝時去西山鸞鶴羣

訪陸羽處士

釋皎然

太湖東西路吳王古山前所思不可見歸鴈自翩翩何山賞春茗
何處弄清泉莫是滄浪子悠悠一釣船

初春

王績

前旦出園遊林華都未有今朝下堂望池冰開已久雪避南軒梅
風催北庭柳遙呼竈前妾却報機中婦年光恰恰來滿甕營春酒

南充謝郡客遊澧州留贈字文中丞

暢當

僕本渡落人辱當州郡使量力頗及早謝歸今即已蕭蕭若凌虛
衿帶頓銷靡車服率然來泮陽作遊子鬱鬱寡開顏默默獨行李

忽逢平生友一笑方在此秋情寧風日楚思浩雲水爲語弋林者
冥冥鴻遠矣

村居

沈亞之

無樹巢宿鳥無酒共客醉月上蟬韻殘梧桐陰繞地獨出村舍門
吟劇微風起蕭蕭蘆荻叢斗嘯如山鬼應綠我憔悴爲我哭秋思

贈劉藍田

王維

籬間犬迎吠出屋候荆扉歲晏輸井稅山村人夜歸晚田始家熟
餘布成我衣詎肯無公事煩君問是非

退居

孟郊

退身何食可敗力不得閑種稻耕白水負薪斫青山衆聽喜巴唱
獨醒愁楚顏日暮靜歸時幽幽叩松關

渭川田家

王維

斜光照墟落深巷牛羊歸野老念牧童倚杖候荆扉雉雊麥苗秀
蠶眠桑葉稀田夫荷鋤至相見語依依羨此良閑逸悵然歌式微

秦中吟十首并序

白居易

貞元元和之際予在長安聞見之間有足悲者因直歌其事命爲秦中吟

議婚

天下無正聲悅耳即爲娛人間無正色悅目即爲姝聲色非相遠貧富則有殊貧爲時所棄富爲時所趨紅樓富家女金縷繡羅襦見人不斂手嬌凝二八初母兄未開口已嫁不須更綠窻貧家女寂寞二十餘荆釵不直錢衣上無真珠幾回人欲娉臨日又踟躕主人會良媒置酒滿玉壺四座且勿飲聽我歌兩途富家女易嫁嫁早輕其夫貧家女難嫁嫁晚孝於姑聞君欲娶婦娶婦意何如

重賦

厚地植桑麻所粟濟生民生民理布帛所求活一身身外充征賦上以奉君親國家定兩稅本意在憂人厥初防其淫明勅內外臣稅外加一物皆以枉法論奈何歲月久貧吏得因循役我以求寵

斂索無冬春織絹未成疋縑絲未盈斤里胥迫我納不許暫逡巡
歲暮天地閉陰風生破村夜深煙火滅霰雪落紛紛幼者形不蔽
老者體無溫悲喘與寒氣併入鼻頭辛昨日輸殘稅因窺官庫門
繒帛如山積絲絮似雲屯号爲羨餘物隨日獻至尊奪我身上暖
買爾眼前恩進入瓊林庫歲久化爲塵

傷宅

誰家起甲第朱門大道邊豐屋中櫛比高墉外迴環纍纍六七堂
棟宇相勾連一堂費百萬鬱鬱起青煙洞房溫且清寒暑不能干
高堂虛且迥坐卧見南山繞廊紫藤架夾砌紅藥欄攀枝摘櫻桃
帶花移牡丹主人此中坐十載爲大官厨有臭敗肉庫有朽貫錢
誰能將我語問爾骨肉間豈無貧賤者忍不救飢寒如何奉一身
直欲保千年不見馬家宅今作奉誠園

傷友

陋巷孤寒士出門苦恹恹雖云志氣在豈免顏色低平生同門友

通籍在金閨曩昔膠漆契爾來雲雨睽正逢下朝歸軒騎五門西
是時天久陰三日雨淒淒蹇驢避路立肥馬當風嘶迴頭忘相識
占道上沙堤昔年洛陽社貧賤相提攜今日長安道對面隔雲泥
近日多如此非君獨慘悽死生不變者唯聞任與黎任公達黎逢
不致仕

七十而致仕禮法有明文何乃貪榮者斯言如不聞可憐八九十
齒墮雙眸昏朝露貪名利夕陽憂子孫挂冠顧翠綏懸車惜朱輪
金章腰不勝偃僕入公門誰不愛富貴誰不戀君恩年高須告老
名遂合退身少時共嗤誚晚歲多因循賢哉漢二疎彼獨是何人
寂寞東門路無人繼去塵

立碑

勲德既下衰文章亦陵夷但見山中石刻作路傍碑銘勲悉太公
叙德皆仲尼復以多爲貴千言直萬貫爲文彼何人想見下筆時
但欲愚者悅不思賢者嗤豈獨賢者嗤仍傳後代疑古石蒼苔字

安知是愧辭我聞望江縣翹令撫惇嫠憐齡名在官有仁政名不
聞京師身歿欲歸葬百姓遮路岐攀轅不得去留葬此江湄至今
道其名男女涕皆垂無人立碑碣唯有邑人知

輕肥

意氣驕滿路鞍馬光照塵借問何爲者人稱是內臣朱紱皆大夫
紫綬或將軍誇赴軍中晏走馬去如雲罇壘溢九醞水陸羅八珍
果擘洞庭橘鱠切天池鱗食飽色自若酒酣氣益振是歲江南旱
衢州人食人

五弦

清歌且罷唱紅袂亦停舞趙叟抱五弦宛轉當曾撫大聲粗音麤若
散颯颯風和雨小聲細欲絕切切鬼神語又如鵲報喜轉作啼猿
苦十指無定音顛倒宮徵羽坐客聞此聲形神若無主行客聞此
聲駐足不能舉嗟嗟俗人耳好今不好古所以北窓琴日日生塵
土

歌舞

秦城歲云暮大雪滿皇州雪中朝退者朱紫盡公侯貴有風雲興
富無飢寒憂所營唯第宅所務在追遊朱輪車馬客紅燭歌舞樓
懽酣促密坐醉暖脫重裘秋官爲主人廷尉居上頭日中一爲樂
夜半不能休豈知閩鄉獄中有凍死囚

買花

帝城春欲暮誼誼車馬度共道牡丹時相隨買花去貴賤無常價
酬直看花數灼灼十朶紅芟芟五束素上張幙屋庇旁織笆籬護
水灑復泥封移來色如故家家習爲俗人人迷不悟有一田舍翁
偶來買花處低頭獨長嘆此嘆無人諭一叢深色花十戶中人賦

憫農二首

李紳

春種一粒粟秋收萬顆子四海無閒田農夫猶餓死
鋤禾日當午汗滴禾下土誰知盤中飧粒粒皆辛苦

石壕吏

杜甫

莫投石壕村有吏夜捉人老翁踰墻走老婦出門看吏呼一何怒
婦啼一何苦聽婦前致詞三男鄴城戍一男附書至二男新戰死
在者且偷生死者長已矣室中更無人所有乳下孫有孫母未去
出更無完裙老嫗力雖衰請從吏夜歸急應河陽役猶得備晨炊
夜久語聲絕如聞泣幽咽天明登前途獨與老翁別

辛苦吟

于漬

壠上扶犁兒手種腹長飢窻下擲梭女手織身無衣我願燕趙姝
化爲嫗母姿一笑不直錢自然家國肥

田家詞

元稹

牛吒吒鱗角田确确旱塊敲牛啼趵趵音種得官倉珠顆穀六十
年來兵簇簇月月倉糧車轉轉一日官軍收海服驅牛駕車食牛
肉歸來收得牛兩角重鑄鋤犁作斤斲姑舂婦擔輸促促輸官不
足歸賣屋農死有兒牛有犢不遣官軍糧不足

傷田家

韞裏中

二月賣新絲五月糶秋穀
醫得眼前瘡剗却心頭肉
我願君王心化作光明燭
不照綺羅筵偏照逃亡屋

采玉行

韋應物

官府徵白丁言采藍溪王絕嶺
夜無人深榛雨中宿獨婦餉糧
還哀哀舍南哭

茶山作

袁高

禹貢通遠俗所圖在安人
后王失其本職吏不敢陳
亦有姦佞者因茲欲求伸
動生千金費日使萬姓貧
我來顧渚源得與茶事親
吐輟耕農米採採實苦辛
一夫且當役盡室皆同臻
捫葛上欹壁蓬頭入荒榛
終朝不盈掬手足皆皴鱗
悲嗟遍空山草木爲不春
陰嶺芽未吐使者牒已頻
心爭造化力先走挺塵均
選納無晝夜擣聲昏繼晨
衆工何枯槁俯視彌傷神
皇帝尚巡狩東郊路多堙
周迴遶天涯所獻逾艱勤
況減兵革困量茲固疲民
未知供御餘誰合分此珍
顧省忝邦守又慙復因循
茫茫滄海間丹憤何由申

野老歌

張籍

老翁家貧在山住耕種山田三四畝苗踈稅多不得食輸入官倉
化爲土歲暮鋤犁傍空室呼兒登山收橡食西江賈客珠百斛船
中養犬長食肉

野行

姚合

客行野田間比屋皆閉戶借問屋中人盡去作商賈官家不稅商
稅農服作苦居人競東西道路侵隴畝採玉上山巔探珠入水府
邊兵索衣食此物同泥土古來一人耕三人食猶飢如今千萬家
無一把鋤犁我倉常空虛我田生蒺藜上天不雨粟何由活蒸黎

重校正唐文粹卷第十六下

重校正唐文粹卷第十七上

吳興姚

鉉

纂

詩十一 摠五十九首

古調歌篇七

寺觀十一

始除尚書郎別善福精舍 常應物

寄閭防 劉春虛

題鶴林寺 薛據

題破山寺後禪院 常建

琅邪山寺

常應物 簡寂觀西澗瀑布下作

五老峯贈隱者 姚 石門墨山有禪堂道觀天下絕境 張說

題思禪寺 獨孤及 仙遊寺有龍潭穴弄玉祠 李華

遊棲霞寺 顧況

廟社四

四皓廟 元稹

魚山神女歌詞二首 王維

古社 元稹

邊塞三

虜患 張陵

代北州老翁答 張謂 遠西 崔顥

畫圖六

王處士草堂壁畫衡霍諸山 劉長卿 題劉相公三湘圖 即士

觀于舍人壁畫山水 王季友 題遐上人古松歌 朱

畫竹歌 白居易 觀李湊所畫美人障子 劉長卿

古器物五

石鼓歌 韓愈 古劍歌 郭元振 磨鏡篇 劉禹錫

贈友人古鏡 朱書 團扇歌 劉禹錫

樂器七

彈琴 劉希戩 江上琴興 常建 聽蜀僧彈琴 李白

奉和張舍人閣中直夜思聞雅琴因書事 呂溫

聽彈風入松贈楊補闕 王昌齡 金陵聽韓侍御吹笛 李

武昌老人說笛歌 劉禹錫

草木十一

題老張松樹宋之問

古栢行杜甫

脩竹篇陳子昂

種竹元稹

竹徑偶作權德輿

露青竹鞭歌顧況

暑日題道邊樹王

井上桐陸龜蒙

石上藤岑參

兔絲元稹

春草謠顧況

禽鳥昆蟲十

王兵馬使二角鷹杜甫

觀放白鷹李白

飛鷲操劉禹錫

百舌吟

鸚鵡詞蘇郁

鴛鴦篇陳子昂

子規啼韋應物

鷓鴣吟劉禹錫

春蟬元稹

江上蚊子韋楚老

道路二

戲題關門岑參

門前路陸龜蒙

始除尚書郎別善福精舍

韋應物

簡略非世器委身同草木逍遙精舍居飲水自爲足累日曾一櫛

對書常懶讀社臘會高年山川恣遊矚明世方選士中朝懸美祿
除書忽到門冠帶便拘束愧忝即署迹謬蒙君子錄俯仰垂華纓
飄飄翔輕轂行將親愛別戀此西澗曲遠峯照夕川夏雨生衆綠
迅風飄野路迴首不遑宿明晨下煙闕白雲在幽谷

寄閻防

時在終南山豐德寺讀書

劉沓虛

青暉南山色君與緇錫隣深路入古寺落花隨暮春紛紛對寂寞
往往落衣巾松色空照水經聲時有人晚心復南望山遠情獨親
應以脩徃業亦唯此立身深林度空夜煙月資清真莫嘆文明日
彌年從隱淪

題鶴林寺

薛據

道門隱形勝向背臨法橋松覆山殿冷花藏溪路遙珊珊寶幡挂
燄燄明燈燒遲日半空谷春風連上潮少憑水木興暫忝身心調
願謝携手客茲山禪侶饒

題破山寺後禪院

常建

清晨入古寺初日明高林竹徑通幽處禪房花木深山光悅鳥性
潭影空人心萬籟此都寂但餘鍾磬音

琅邪山寺

韋應物

受命恤人隱茲遊久未忘鳴鶻響幽澗前旌耀崇崗青冥臺砌寒
綠縹草木香填壑墜花界疊石構雲房經制隨巖轉繚繞豈定方
新泉洩陰壁高蘿蔭綠塘攀林一棲心飲水得清涼還歸坐郡閣
但見山蒼蒼

簡寂觀西澗瀑布下作

淙流絕壁散虛煙翠澗深巖際松風起飄颻來灑襟窺蘿玩猿鳥
解組傲園林茶菓邀真侶觴酌洽同心曠歲懷茲賞春行始重尋
聊將橫吹笛一寫山水音

五老峯大明觀贈隱者

姚係

雲觀此山北與君携手稀林端涉橫水洞口入斜暉乍覺鸞鶴邇
忽爲煙霧飛故人清和客默會琴心微丹術幸可授青龍當木歸

悠悠平生意此日復相違

石門墨山二山相連有禪堂道觀天下絕境 張說

茵輪江上山近在華容縣常陟巴丘首天晴遙可見佳遊屢前諾
芳月愆幽眷及此符守移懽言臨道便旣携賞心客復有送行掾
竹徑入陰窅松崖上空藉草共林一色雲與峯萬變探窺石門斷
緣越沙澗轉兩山勢爭雄峯巘相顧盼藥妙靈仙寶境華巖壑選
清都西淵絕金地東敞宴池果接園畦風煙瀾臺殿高尋去石頂
曠覽天宇徧千山紛滿目百川豁對面騎來雲氣迎人去鳥聲戀
長揖桃源士舉世同企羨

題思禪寺上方

獨孤及

溪口聞法鼓停撓登翠屏攀雲到金界合掌開禪扃鬱律衆山抱
空濛花雨零老僧指香樓云是不死亭眇眇千越路茫茫春草青
遠山噴百谷繚繞馳東溟目極想何在境照心亦冥驕然諸根空
破結如破瓶下視三界狹但聞五濁腥山中有良藥吾欲墮天形

仙遊寺有龍潭穴弄玉祠

李華

捨事入樵逕雲木深谷口萬壑移晦明千峯轉前後疑然龍潭上
石勢若奔走開坼秋天光崩騰夏雷吼靈溪自茲去紆直互紛糾
聽聲靜復喧望色無更有冥冥翠微下高殿映杉柳滴滴洞穴中
懸泉響相扣昔時秦王女羽化年代久日暮松風來簫聲生左右
早窺神仙籙願結芝木友安得羨門方青囊繫吾肘

遊棲霞寺

顧況

棲霞山中子規鳥口邊血出啼不了山僧後夜初入定聞似不聞
山月曉

四皓廟

元稹

巢由昔避世堯舜不得臣伊呂雖急病湯武乃可君四賢胡爲者
千載名氛氲顯晦有遺跡前後疑不倫秦政虐天下黷武窮生民
諸侯戰心死壯士眉亦顰張良韓孺子椎碎屬車輪遂令英雄意
日夜思報秦先生相將去不復嬰世塵雲卷在孤岫龍潛爲小鱗

秦皇轉無道諫者鼎鑊親茅焦脫衣諫先生無一言趙高殺二世
先生如不聞劉項取天下先生遊白雲海內八年戰先生全一身
漢業日已定先生名亦振不得爲濟世宜哉爲隱淪如何一朝起
屈作儲貳賓安存孝惠帝摧頓戚夫人捨大以謀細虬盤而蠖伸
惠皇竟不嗣呂氏禍有因雖懷安劉志未若周與陳皆落子房術
先生道何屯出處貴明白故吾今有云

魚山神女歌詞二首

王維

迎神

坎坎擊鼓魚山之下吹洞簫望極浦女巫進紛屢舞陳瑤席湛清
醑風淒淒兮夜雨神之來兮不來使我心兮苦復苦

送神

紛進拜兮堂前目眷眷兮瓊筵來不語兮意不傳作暮雨兮愁空
山悲急管思繁絃靈芝駕儼欲旋倏雲收兮雨歇山青青兮水潺
潺

古社

元稹

古社基趾在人散社不神唯有空心樹妖狐藏魅人狐惑意顛倒
臊腥不復聞丘墳變城郭花草仍荆榛良田千萬頃占作天荒田
主人議芟斫怪見不敢前那言空山燒夜隨風馬奔飛聲鼓鞞震
高焰旗幟翻逡巡荆棘盡狐兔無子孫狐死魅人醒煙消壇墀存
繞壇舊田地給授有等倫農收村落盛社樹新團圓社公千萬歲
永保村中民

虜患

張陵

今日漢家探使回蟻疊胡兵來未歇春風渭水不敢流搃作六軍
心上血

代北州老翁答

張謂

負薪老翁住北州北望鄉關生客愁自言老翁有三子兩人已向
黃沙死如今小男新長成明年聞道更徵兵定知此別必零落不
及相隨同死生盡將田宅借鄰伍且復伶俜去鄉土在生本求多

子孫及有誰知更辛苦近傳天子尊武臣強兵直欲靜胡塵安邊
自合有長策何必流離中國人

遼西

崔顥

燕郊芳歲晚殘雪凍邊城四月春草合遼陽春水生胡人正牧馬
漢將日徵兵露重寶刀濕沙虛金鼓鳴寒衣著已盡春服誰與成
寄語洛陽使爲傳邊塞情

王處士草堂壁畫衡霍諸山

劉長卿

愛此衡霍近卷簾如可攀能令堂上客見盡湘南山青翠千萬狀
飛來方丈間歸雲無處滅去鳥何時還勝事日相對主人常獨閑
清陰滿四壁佳氣生重關頗與宿心會看看慰愁顏

題劉相公三湘圖

郎士元

昔別醉衡霍爾來憶南州今朝乎津邸兼得瀟湘遊稍辨荆門樹
依然芳杜洲微明三巴峽咫尺萬里流去鳥不知倦遠帆生暮愁
涔陽指天末北渚空悠悠枕上見漁父座中常狎鷗誰言魏闕下

自有東山幽

觀于舍人壁畫山水

王季友

野人宿在人家少朝見此山謂山曉半壁仍棲嶺上雲開簾放出
湖中鳥獨坐長松是阿誰再三招手起來遲于公大笑向予說小
弟丹青能爾爲

題遐上人院壁畫古松歌

朱灣

石上盤古根謂言天生朽安知草木性變在畫師手陰深方丈間
真趣幽且閒木文離披勢槎枿中裂空心火燒出掃成三寸五寸
枝便作千年萬年物莓苔濃淡意不同一半死皮藏蠹蟲風霜未
必來到此氣色杳似寒山中孤標可翫不可取能使支公道場古

畫竹歌

并序

白居易

協律郎蕭悅善畫竹舉世無倫蕭亦甚自秘重有終歲求其一竿
一枝而不得者知予好事忽寫一十五竿惠然見投予厚其意高
其藝無以荅貺作歌以報之凡一百八十六言歌曰

植物之中竹難寫古今雖畫無似者蕭郎下筆獨逼真丹青已來
唯一人人畫竹身肥擁腫蕭畫莖瘦節節竦人畫竹梢死羸垂蕭
畫枝活葉葉動不根而生從意生不筍而成由筆成野塘水邊碕
岸側森森兩叢十五莖嬋娟不失筠粉態蕭索盡得風煙情舉頭
忽見不似畫低眉靜聽疑有聲西叢七莖勁而健省向天竺寺前
石上見東叢八莖疎且寒憶曾湘妃廟裏雨中看幽姿遠思少人
別與君相顧空長嘆蕭郎蕭郎老可惜手戰眼昏頭雪色自言便
是絕筆時從今此竹尤難得

觀李湊畫美人障子

劉長卿

愛爾含天姿丹青有殊智無間已得象象外更生意西子不可見
千秋無重還空憐浣紗態猶在含毫間一笑豈易得雙蛾如有情
牕風不舉袖但覺羅衣輕華堂翠幕春風來內閣金屏曙色開此
中一見亂人目只疑行到雲陽臺

石鼓歌

韓愈

張生手持石鼓文勸我試作石鼓歌少陵無人謫仙死才薄將柰
石鼓何周綱陵遲四海沸宣王憤起揮天戈大開明堂受朝賀諸
侯劍珮鳴相磨蒐于岐陽騁雄俊萬里禽獸皆遮羅鑿功勒成告
萬世鑿石作鼓隳嵯峨從臣才藝咸第一揀選撰刻留山阿雨淋
日炙野火燎鬼物守護煩撝訶公從何處得紙本毫髮盡備無差
訛詞嚴義密讀難曉字體不類隸與蝌年深豈免有畫缺快劍斫
斷生蛟鼉鸞翔鳳翥衆仙下珊瑚碧樹交枝柯金繩鐵索鎖紐壯
古鼎躍水騰龍梭陋儒編詩不收入二雅褊迫無委蛇孔子西行
不到秦倚撫星宿遺羲娥嗟予好古生苦晚對此涕淚雙滂沱憶
昔初蒙博士徵其年始改稱元和故人從軍在右輔爲我量度掘
臼科濯冠沐浴告祭酒如此至寶存豈多氈包席裏可立致十鼓
只載數駱駝薦諸太廟比部鼎光價豈止百倍過聖恩若許留太
學諸生講解得切磋觀經鴻都尚填咽坐見舉國來奔波剗苔剔
蘚露節角安置妥帖平不頗大厦深簷與蓋覆經歷久遠期無他

中朝大官老於事詎肯感激徒媿嬰牧童敲火牛礪角誰復著手
爲摩挲日消月爍就埋沒六年西顧空吟哦羲之俗書趨姿媚數
紙尚可博白鵝繼周八代爭戰罷無人收拾理則那方今太平日
無事柄任儒術崇丘軻安能以此上論列願借辯口如懸河石鼓
之歌止於此嗚呼吾意其蹉跎

古劍歌

郭元振

君不見昆吾鐵冶飛炎煙紅光紫氣俱赫然良工鍛鍊凡幾年鑄
得寶劍名龍泉龍泉顏色如霜雪良工咨嗟歎竒絕琉璃玉匣吐
蓮花錯鏤金環生明月正逢天下無風塵幸得用防君子身精光
黯黯青蛇色文章片片綠龜鱗非直結交遊俠子亦曾親近英雄
人何言中路遭棄捐零落飄淪古嶽邊雖復沉埋無所用猶能夜
夜氣衝天

磨鏡篇

劉禹錫

流塵翳明鏡歲久看如漆門前負局生爲我一磨拂萍開綠池滿

暈盡金波溢白日照空心圓光走幽室山神杖氣沮野魅真形出
却思未磨時瓦礫來唐突

贈友人古鏡

朱晝

我有古時鏡初自壞陵得蛟龍猶泥蟠魑魅幸月蝕磨久見菱葉
青於藍水色贈君將照心無使心受惑

團扇歌

劉禹錫

團扇復團扇奉君清暑殿秋風入庭樹從此不相見上有乘鸞女
蒼蒼網蟲遍明月入懷袖別是機中練

彈琴

劉希戩

碧山本岑寂素琴何清幽彈爲風入松崖谷颯以秋庭鶴舞白雪
泉魚躍洪流余欲娛世人明月難暗投感嘆未終曲淚下不可收
嗚呼鍾子期零落歸山丘死而若有知魂兮從我遊

江上琴興

常建

江上調玉琴一絃清一心泠泠七絃變萬木澄幽陰能使江月白

又令江水深始知梧桐枝可以徽黃金

聽蜀僧濬彈琴

李白

蜀僧抱綠綺西上峨眉峯為我一揮手如聽萬壑松客心洗流水
餘響入霜鍾不覺碧山暮秋雲暗幾重

奉和張舍人閣中直夜思聞雅琴因書事

呂溫

迢遞天上直寂寞丘中琴憶爾山水韻起予仁智心凝情在正始
超想踈煩襟涼生子夜後月照禁垣深遠風藹蘭氣微露清桐陰
方襲緇衣慶未奉南薰吟

聽彈風入松贈楊補闕

王昌齡

商風入我絃夜竹深有露絃悲與林寂清景不可度寥落幽居心
颼颼青松樹松風吹草白溪水寒日暮聲意去復還九變待一顧
空山多雨雪獨立君始悟

金陵聽韓侍御吹笛

李白

韓公吹玉笛個個儻流玉音風吹繞鍾山萬壑皆龍吟王子停鳳管

師襄掩瑤琴餘響渡江去天涯安可尋

武昌老人說笛歌

劉禹錫

武昌老人七十餘手把庾令相聞書自言年少學吹笛早事曹王
曾賞激往年征鎮戍蘄州楚山蕭蕭笛竹秋當時買林恣搜索典
却身上烏貂裘古苔蒼蒼封老節石上孤生飽風雪商聲五音隨
指發水中龍應行雲絕曾將黃鶴樓上吹一聲占盡秋江月如今
老去興猶遲音韻高低耳不知氣力已無心尚在時時一曲夢中
吹

題老張松樹

宋之問

歲晚東巖下周顧何悽惻日落西山陰衆草起寒色中有喬松樹
使我長嘆息百尺無寸枝一生自孤直

古栢行

杜甫

孔明廟前有老栢柯如青銅根如石霜皮溜雨四十圍黛色參天
二千尺君臣已與時際會樹木猶爲人愛惜雲來氣接巫峽長月

出寒通雪山白憶昨路遶錦亭東先主武侯同闕宮崔嵬枝幹郊
原古窈窕丹青戶牖空落落盤踞雖得地冥冥孤高多烈風扶持
自是神明力正直元因造化功大厦如傾要梁棟萬牛迴首丘山
重不露文章世已驚未辭翦伐誰能送苦心豈免容螻蟻香葉曾
經宿鸞鳳志人幽士莫怨嗟古來才大難爲用

與東方左史脩竹篇

并序

陳子昂

東方公足下文章道弊五百年矣漢魏風骨晉宋莫傳然而文獻
有可徵者僕嘗暇時觀齊梁間詩彩麗競繁而興寄都絕每以永
嘆竊思古人常恐逶迤頽靡風雅不作以耿耿也一昨於解三處
見明公詠孤桐篇骨氣端翔音情頓挫光映朗練有金石聲遂用
洗心飾視發揮幽鬱不圖正始之音復覩於茲可使建安作者相
視而笑解君云張茂先何敬祖東方生與其比肩僕亦以爲知言
也故感嘆雅製作脩竹詩一篇當有知音以傳示之

龍種生南岳孤翠鬱亭亭峯頂上崇翠煙雨下微冥夜聞鼯鼠叫

晝聒泉壑聲春風正淡蕩白露已清冷哀響激金奏密色滋玉英
歲寒霜雪苦含彩獨青青豈不厭凝冽羞比春木榮春木有盈歇
此節無凋零始願比金石終古保堅貞不意伶倫子吹之學鳳鳴
遂偶雲龢瑟張樂奏天庭妙曲方千變簫韶已九成信蒙雕斲美
常願事僊靈驅馳翠虬駕伊鬱紫鸞笙結交羸臺女吟弄昇天行
携手登白日遠遊戲赤城低昂玄鶴舞斷絕彩雲生永隨衆仙去
三山遊王京

種竹

并序

元稹

昔樂天贈余詩云無波古井水有節秋竹竿余秋來種竹廳下因
而有懷聊書十韻

昔公憐我直比之秋竹竿秋來苦相憶種竹廳前看失地顏色改
傷根枝葉殘清風猶浙浙高節空團團鳴蟬聒莫景跳蛙築幽欄
塵土復晝夜梢雲良獨難丹丘信云遠安得臨仙壇沕瘴冬草綠
何人驚歲寒可憐亭亭幹一一青琅玕孤鳳竟不至坐傷時節闌

竹逕偶作

權德輿

退朝此休沐閉戶無塵氛支策入幽逕清風隨此君琴觴恣偃傲
蘭蕙相葢蓋幽賞方自適林西煙景曛

露青竹鞭歌

顧況

鮮于仲通正當年章仇兼瓊在蜀川約東蜀兒採馬鞭蜀兒採鞭
不敢眠橫截斜飛飛鳥邊繩橋夜上層崖巔頭插白雲踏飛泉採
得馬鞭長且堅浮漚丁子珠聯聯灰煮蠟楷光爛然章仇兼瓊持
上天上天雨露何其偏飛龍閑廢馬數千朝飲吳江夕秣燕紅塵
撲轡汗濕韉師子麒麟聊比肩曲江昆明洗刷牽四蹄踏浪頭拚
天蛟龍稽顙河伯虔拓羯胡鷄脚手鮮陳閔韓幹丹青妍欲貌未
貌眼欲穿金鞍玉勒錦連乾騎入桃花楊柳煙十二樓中秦管絃
樓中美人奪神仙爭愛大家把此鞭祿山入關關破年忽見揚州
北邨前祇有人還千一錢亭亭筆直無皺節磨捋形相一條鐵市
頭格是無人別江海賤臣不拘絙垂鞘挂影西窓缺稚子覓衣挑

仰宥家僮拾薪幾物折玉潤猶霑玉壘雪碧鮮似滌苙弘血蜀帝
祠邊子規咽相如橋上文君絕往來策馬降至尊七盤九折橫劍
門穆王八駿超崑崙安用冉冉孤生根聖人不貴難得貨金玉珊
瑚誰買恩

暑日題道邊樹

王穀

火輪迸焰燒長空浮埃撲面愁濛濛羸僮走馬喘不進忽逢碧樹
含清風清風留我移時住滿地濃陰懶前去却嘆人無及物功不
似團團道邊樹

井上桐

陸龜蒙

美人傷別離汲井常待曉愁因轆轤轉驚起雙棲鳥獨立傍銀牀
碧桐風嫋嫋

石上藤

岑參

石上生孤藤弱蔓依石長不逢高枝引未得凌空上何處堪託身
爲君長萬丈

兔絲

元稹

人生莫依依，依依事不成。君看兔絲蔓，依倚榛與荆。荆榛易蒙密，百鳥撩亂鳴。下有狐兔穴，奔走亦縱橫。樵童斫將去，柔蔓與之并。翳蒼生可耻，束縛死無名。桂樹月中出，珊瑚石上生。俊鷲渡海食，應龍昇天行。靈物本特達，不復相纏縈。纏縈竟何者，荆棘與飛莖。

春草謠

顧況

春草不解行，隨人上東城。正月二月色，綿綿千里萬里傷人情。

舍南風雨王兵馬使二角鷹

杜甫

悲臺蕭颯石龍漉，哀澗杈枒浩呼洶。中有萬里之長江，迴風陷日孤光動。角鷹翻倒壯士臂，將軍玉帳軒翠氣。二鷹猛腦徐侯隄，目如愁胡視天地。杉雞竹兔不自惜，溪虎野羊俱闕易。韝上鋒稜十二翻，將軍勇銳與之敵。將軍樹勳起安西，崑崙虞泉入馬蹄。白羽曾肉三狡獬，敢決豈不與之齊。荆南芮公得將軍，亦如角鷹下翔雲。惡鳥飛飛啄金屋，安得爾輩開其群。驅出六合梟鷲分。

觀放白鷹

李白

八月邊風高，胡鷹白錦毛。孤飛一片雪，百里見秋毫。

飛鷹操

劉禹錫

鷲飛杳杳青雲裏，鷲鳴蕭蕭風四起。旗尾飄揚勢漸高，箭頭砧割聲相似。長空悠悠霽日懸，六翻不動凝非煙。游鷗翔鷹出其下，慶雲清景相迴旋。忽聞饑鳥噪，相聚瞥下雲中爭。腐鼠騰音礪吻相，喧呼仰天大嚇疑。鷄鷄畏人避，大投高處俛啄無聲。猶屢顧青鳥，自愛玉山禾仙禽。徒貴華亭露撲檄，危巢向暮時陪鱖。飽腹蹲枯枝，遊童挾彈一麾肘。臆碎羽分人不悲，天生衆禽各有類。威鳳文章在仁義，鷹隼儀形螻蟻心。雖能唳天何足貴。

百舌吟

曉星寥落春雲低，初聞百舌間關啼。花枝滿空迷處所，搖動繁英墜。紅雨笙簫百轉音，韻多黃鸝吞聲燕。無語東方朝日遲，遲升迎風弄景如自驚。數聲不盡又飛去，何許相逢綠楊路。絛蠻宛轉似

娛人一心百舌何紛紜醜顏俠少傳歌聽墮珥妖姬和睡聞可憐
光景何時盡誰能低回避鷹隼廷尉張羅自不關潘郎挾彈無情
損天生羽族爾何微舌端萬變乘春暉南方朱鳥一朝見索漠無
言蒿下飛

鸚鵡詞

蘇郁

莫把金籠閉鸚鵡箇箇分明解人語忽然更向君前語三十六宮
愁幾許

鴛鴦篇

陳子昂

飛飛鴛鴦鳥舉翼相蔽虧俱來淥潭裏共向白雲涯音容相眷戀
羽翮兩淩迤蒨萍戲春渚霜霰遶寒池浦沙連岸淨汀樹拂潭垂
年年此遊翫歲歲來追隨鳳凰起丹穴獨向梧桐枝鴻鴈來紫塞
空憶稻梁施烏啼倦依託鶴鳴傷別離豈若此雙禽翻飛不異林
刷羽清江浦交頸紫山岑文章負奇色和鳴多好音聞有鴛鴦綺
復有鴛鴦衾持爲美人贈勗此故交心

子規啼

韋應物

高林滴露夏夜清
南山子規啼一聲
鄰家嬌婦抱兒泣
我獨展轉何爲情

鷓鴣吟

劉禹錫

朝陽有鳴鳳不聞千萬祀
鷓鴣催衆芳畏聞先入耳
秋風白露晞從是爾啼時
如何上春日唧唧滿庭飛

春蟬

元稹

我自東歸日厭苦春鳩聲
作詩憐化工不遣春蟬生
及來商山道山深氣不平
春秋兩相似虫豸百種鳴
風松不成韻蜩蟬沸如羹
豈無朝陽鳳羞與微物爭
安得天上雨奔渾河漢
傾蕩滌反時氣然後好晴明

江上蚊子

韋楚老

搖狹翅亞紅腹江邊夜起如雲哭
請問貪婪一點心腐肉填腹幾
多足越女如花住江曲寒娥夜夜凝
雙綠任君撩亂錦窓中十幅

輕綃圍夜王

戲題關門

岑參

來亦一布衣去亦一布衣羞見關城吏還從舊路歸

門前路

陸龜蒙

門前向城路一直復一曲曲去日中還直行日暮宿何必日中還
曲塗荆棘間

重校正唐文粹卷第十七上

重校正唐文粹卷第十七下

吳興姚

鉉

纂

詩十二 摠五十六首

古調歌篇八

月明河四

月生句 劉猛

把酒問月 李白

月蝕詩 盧仝

明河篇 宋之問

風雨露雪六

賀雨詩 白居易

洛陽清明日雨霽 李正封

詠露

山雪 釋皎然

秋風引 劉禹錫

竹牕聞風寄苗發司空曙 李益

江海泉水十

觀海 獨孤及

西陵口觀海 薛據 題玉潭 獨孤及

及第後過楊子江 施肩吾

責漢水詞 李善夷

迎潮送潮詞二首 陸龜蒙

引泉詩

賦得三峽流泉歌 李季蘭

明水篇 富嘉謨

宮禁七

殿前曲 王昌齡 西施篇 王維

三閣詞四首 劉禹錫

霓裳羽衣曲 李暄

神仙二十九

遊仙詩十六首 道士吳筠

上元夫人詩 李白

王子喬 宋之問

玉真仙人詞 李白 夢太白峯西 常建

苦篁調笑引 李賀 少室山韋鍊師昇仙歌 皇甫冉

宿青牛谷梁鍊師仙居 楊衡

玄都壇歌 杜甫

寄全椒山中道士 韋應物

洗心 道士司馬退之

齋心 王昌齡

寄菖蒲 張籍

金璫玉佩歌 顧況

月生句

劉猛

月生十五前日望光彩圓月滿十五後日畏光彩瘦不見夜花色

一樽成暗酒匣中苔背銅光短不遍空不惜補明月慙無此良工

把酒問月

故人賈淳令余問之

李白

天十月

青天有月來幾時我今停盃一問之人攀明月不可得月行却與人相隨皎如飛鏡臨丹闕綠煙滅盡清輝發但見宵從海上來寧知曉向雲間沒白兔搗藥秋復春姮娥孤棲誰與鄰今人不見古時月今月曾經照古人古人若流水共看明月皆如此唯願當歌對酒時月光長照金樽裏

月蝕詩

盧仝

新天子即位五年歲次庚寅斗柄插子律調黃鍾森森萬木夜殭立寒氣聳肩頑無風爛銀盤從海底出出來照我草屋東天色紺滑凝不流冰光交貫寒瞳矐初疑白蓮花浮出龍王宮八月十五夜比並不可雙此時怪事發有物吞食來輪中輪如壯士斧斫壞桂似雪山風拉摧百鍊鏡照見膽平地埋寒灰火龍珠飛出腦却入蚌蛤胎槌環破壁眼看盡當天一搭如煤始磨蹤滅跡須臾間

便似萬古不可開不料至神物有此大狼狽星如撒沙出爭頭事
 光大奴婢炷燈看揜烏感切葵如玳瑁今夜吐燄如長虹孔隙千道
 射戶外玉川子涕泗下中庭獨自行念此日月者太陰太陽精皇
 天要識物日月乃化生走天汲汲勞四體與天作眼行光明此眼
 不自保天公行道何由行吾見陰陽家有說望日蝕月月光滅朔
 月掩日日光缺兩眼不相攻此說吾不容又孔子師老子云五色
 令人目盲吾恐天似人好色則喪明幸且非春時萬物不嬌榮青
 山破瓦色淥水冰崢嶸花枯無女艷鳥死沉歌聲頑冬何所好偏
 使一目盲又聞古老說蝕月蝦蟇精徑圓千里入汝腹如此癡駭
 阿誰生可從海窟來便解緣清真恐是睚睫閒指塞所化成黃帝
 有二目帝舜重瞳明二帝懸四目四海生光輝吾不遇二帝滉漭
 不可知何故瞳子上坐使蟲豸欺長嗟白兔搗靈藥恰似有意防
 姦非藥成滿白不中度委任白兔夫何為憶昔堯為天十日燒九
 州金爍水銀流玉熠丹砂焦六合烘為窰堯心增百憂天見堯心

憂勃然發怒決洪流立擬沃殺九日妖天高日走沃不及但見萬
國赤子戢戢生魚頭此時九御導九日爭持節幡麾幢旋駕車六
九五十四頭蛟螭剉掣電九火輶汝若蝕開齟齬輪御轡執索相
爬鉤推蕩轟渴入汝喉紅鱗燄鳥燒口快翎鬣倒側聲酸鄒撐腸
拄肚礪礪如山丘自可飽死更不偷不獨填飢坑亦解竟心憂恨
汝時當食埋頭撒腦不肯食不當食張唇哆嘴食不休食天之眼
養逆命安得上帝請汝劉嗚呼人養虎被虎齧天媚墓被墓瞎乃
知恩非類一一自作孽吾見患眼人必索良工諛想天不異人愛
眼固應一安得常娥氏來習扁鵲術手操春喉戈去此睛上物初
既猶朦朧既又如抹漆但恐功業成便此不吐出玉川子又涕泗
下心禱再拜額搨沙土中地上蟣虱臣全告訴帝天皇臣心有鐵
一寸可剗妖蠶癡腸皇天不爲臣立梯磴臣血肉身無由飛上天
揚天光封詞付與小心風颭排閭闔入紫宮密邇玉几前劈折奏
上臣全頑愚曾敢死橫干天甚長東方蒼龍角插戟尾揮風當心

開明堂統領三百六十鱗蟲坐治東方宮月蝕不救援安用東方
 龍南方火鳥赤潑血項長尾短飛跋刺頭戴井冠高達栴月蝕鳥
 官十二度鳥為居傳主人不覺察貪向何人家行赤口毒舌毒蟲
 頭上喫却月不啄殺虛貶鬼眼赤突抉音審鳥罪不可雪西方攫虎
 立掎掎音斧為牙鑿為齒偷犧牲食封豕大墓一齧固當軟美見
 似不見是何道理爪牙根天不念天天若准擬錯准擬北方寒龜
 被蛇縛藏頭入殼如入獄蛇筋束緊束破殼寒龜夏鼈一種味且
 當臙其肉一底板沒信處唯堪支牀脚不中鑽灼與天下卜歲星
 主福德官爵奉董秦忍使黔婁生覆尸無衣巾天失眠不弔歲星
 胡其仁熒惑矍鑠公執法大不中月明無罪過不糾蝕月蟲年年
 十月朝太微支虛謫罰何災凶土星與土性相背反養福德生禍
 害到人頭上死破敗今夜月蝕安可會大白真將軍怒激鋒鉞生
 恒州陣斬鄺定進項骨脆甚春蔓菁天唯兩眼失一眼將軍何處
 行天兵辰星任廷尉天律自主持人命在盆底固應樂見天育時

天若不肯信試喚臯陶鬼一問而今三台文章官作上天紀綱環
天二十八宿磊落尚書郎整頓排班行劔握他人將一四太陽側
一四天市旁操斧代大匠兩手不怕傷弧矢引滿反射人天狼呀
啄明煌煌癡牛與騃女不肯勤農桑徒勞含淫思旦夕遙相望蚩
尤簸旗弄旬始搥天鼓鳴璫琅枉矢龍蛇行眉目森森張天狗下
舐地血流何滂滂謫險萬萬黨構架何可當眯目豐成就害我光
明王請留北斗一星相比極指揮萬國懸中央此外盡拂除沙磧
如山岡贖我父母光當時恆星沒殞雨如抨漿似天會事發叱喝
誅姦狂何故中道廢自遺今日殃善善又惡惡郭公所以亡願天
神聖心無信他人忠玉川子詞訖風色緊格格近月墨暗邊有似
動劔戟須臾癡墓精兩吻自決垆初露半个壁漸吐蒲輪魄衆星
盡原赦一墓獨誅磔腹肚忽脫落依舊挂穹碧光彩未蘇來慘淡
一片白奈何萬里光受此吞吐厄再得見天眼感荷天地力或問
玉川子孔子修春秋二百四十年月蝕盡不收今子咄咄詞頗合

孔意不玉川子笑蒼或請聽逗遛孔子父母魯諱魯不諱周書外
書大惡故月蝕不見收余命唐天口食唐王唐禮過三唐樂過五
小猶不說大不可數災沴無有小大瘡安引衰周研覈可否日分
晝月分夜辨寒暑一主刑一主德政乃舉孰為人面上一目偏可
去願天完兩日照下萬方土更不瞽萬萬古

明河篇

宋之問

八月涼風天氣晶萬里無雲河漢明昏見南樓清且淺曉落西山
縱復橫洛陽城闕天中起長河夜夜千門裏複道連櫳共蔽虧畫
堂瓊戶特相宜雲母帳前初汎濫水精簾外轉逶迤倬彼昭回如
練白復出東城接南陌南陌征人去不歸誰家今夜擣寒衣鴛鴦
機上踈螢度烏鵲橋邊一鴈飛鴈飛螢度愁難歇坐見明河漸微
沒已能舒卷任浮雲不惜光輝讓流月明河可望不可親願得乘
槎一問津更將織女支機石還訪成都賣卜人

賀雨詩

白居易

皇帝嗣寶歷元和三年冬自冬及春暮不雨旱熾熾上心念下民
懼歲成災凶遂下罪已詔殷勤告萬邦帝曰予一人繼天承祖宗
憂勤不遑寧夙夜心忡忡元年誅劉闢一舉靖巴邛二年戮李錡
不戰安江東顧惟眇眇德遽有巍巍功或者天降沴無乃儆予躬
上思答天戒下思致時邕莫如率其身慈和與儉恭乃命罷進獻
乃命賑飢窮宥死降五刑責已寬三農宮女出宣徽廡馬減飛龍
庶政靡不舉皆出自宸衷奔騰道路人偃僕田野翁懽呼相告報
感泣涕霑曾順人人心悅先天天意從詔下纔七日和氣生沖融
凝爲油油雲散作習習風晝夜三日雨淒淒復濛濛萬心春熙熙
百穀青芄芄人變愁爲喜歲易儉爲豐乃知王者心憂樂與衆同
皇天及后土所感無不通冠珮何鏘鏘將相及王公蹈舞呼萬歲
列賀明庭中小臣誠愚陋職忝金鑾宮稽首再三拜一言獻天聰
君以明爲聖臣以直爲忠敢賀有其始亦願有其終

洛陽清明日雨霽

李正封

曉日清明天夜來
嵩少雨千門尚煙火
九陌無塵土酒醪河橋春
漏閑宮殿半遊人
戀芳草半犯嚴城鼓

詠露

霏霏靈液重雲表
無聲落露樹急玄蟬灑
池淒皓鶴流塵清遠陌
飛月登高閣宵潤玉堂
簾曙寒金井索佳人比
珠淚坐感紅綃薄

山雪

釋皎然

夕陽在西峯疊翠縈
殘雪狂風卷絮迴
驚猿攀玉折何意山中
人誤報山花發

秋風引

劉禹錫

何處秋風至蕭蕭送鴈群
今朝入庭樹孤客最先聞

竹窻聞風寄苗發司空曙

李益

微風驚暮坐臨牖思悠悠
裁開門復動竹疑是故人來
時滴枝上露稍霑塔下苔
幸當一入幌為拂綠琴埃

觀海

獨孤及

北登激海島回首秦東門誰尸造物功鑿此天池源
涸洞吞百谷周流無四垠廓然混茫際望見天地根
白日自中吐扶桑如可捫迢遙蓬萊峯想像金臺存
秦帝昔經此登臨異飛翻揚旌百神會望日羣山奔
徐福竟何成羨門徒空言唯見石橋足千年潮水痕

西陵口觀海

薛據

浙江漫湯湯近海勢彌廣在昔胚混凝融爲百川長
地形失端倪天色潛滉漾東南際萬里極目遠無象
山影乍浮沉潮波忽來往孤帆或不見棹歌猶響像
日暮長風起客心空振蕩浦口霞未收潭心月初上
林嶼幾迢迢亭臯時偃仰歲晏訪蓬瀛真遊非外獎

題玉潭

獨孤及

碧玉徒強名冰壺難比德唯當寂照心可並滌淪色

及第後過楊子江

施肩吾

憶昔將貢年抱愁此江邊魚龍互閃爍黑浪高於天
今日步春草復來經此道江神也世情爲我風色好

責漢水辭并序

李善夷

春秋僖公四年齊桓公合諸侯之師盟于召陵責楚之苞茅不入問昭王南征而不復楚子使屈完對曰貢之不入寡君之罪也敢不供給昭王南征之不復君其問諸水濱按昭王南征至漢丹人膠其舟王遂溺死杜預曰當時漢水未屬楚杜之注其爲謬哉且楚實殷之始封楚苦縣瀨鄉在漢水東北六百餘里則漢水於西周之際豈未屬楚乎又詩云撻彼殷武奮伐荆楚深入其阻哀荆之旅鄭玄注云深入方城之阻也方城今在漢水北三百里豈昭王時未屬楚乎屈完改齊桓所問之大不敢他對但請自問於水濱之人言我不之知也漢實屬楚久矣夫山林川澤天子祀之必有其神楚人膠其船而禍其君神不能福神之罪也余過漢見其波濤滉瀆而責其水詞曰

漢之廣兮風波四起雖有風波不如蹄涔之水蹄涔之水不爲下國而傾天子漢之深兮其隄莫量雖云莫量不如行潦之汪行潦

之汪不爲下國而溺天王漢之美者曰魴吾雖飢不食其魴恐汚
吾之飢腸

迎潮送潮詞二首 并序

陸龜蒙

余耕稼所在松江南旁田廬門外有溝通浦淑而朝夕之潮至焉
天弗雨則軋而留之用以滌濯灌溉及物之功甚鉅其羸壯遲速
繫望晦盈虛也用之則順而進捨之則默以退有類乎君子之道
翫而感之作迎潮送潮詞二首聊寄聲於騷人之末

江霜嚴兮楓葉丹潮聲高兮墟落寒鷗巢卑兮漁箔短遠岸沒兮
光爛爛潮之德兮無際既充其大兮又充其細密幽人兮款柴門
寂寞流連兮依稀舊痕濡餘澤槁兮潮之恩不尸其功兮歸于混
元

右迎潮

潮西來兮又東下日染中流兮紅灑灑汀葭蒼兮水蓼枯風騷牢
兮愁煙孤大幾望兮微將翳晦搜瀛溶兮斂然而退愛長波兮數

數一幅巾兮無纓可濯帆生塵兮棹有衣帳潮之還兮吾猶未歸

右送潮

引泉詩 睦州龍興觀老君院作

上嗣位六載吾宗刺桐川余來拜旌戟詔下之明年是時春三月
繞郭花蟬聯嵐盤百萬髻上插黃金鈿授以道士館置榻于東偏
蒲院聲碧樹空堂形老仙本性樂凝淡及來更虛玄焚香禮真像
盥手披靈編新安山角角烏龍獨巉然鳴籬除非淨晴日不見蒼
崖巔上有拏雲峯下有噴壑泉泉分數十汊落處皆崢嶸寒聲入
爛醉聒破西窻眠支筇起獨尋祇在墻東邊呼僮具畚鍤立鑿莓
苔穿濊滌一派墮練帶橫斜牽亂石拋落落寒流響濺濺狂怒七
里瀨縮到踈楹前跳光潑半散湧沫飛旋圓勢東三峽挂瀉危孤
磴懸曾聞瑤池溜亦濯朱草田鳧伯弄翠藻鸞鷁舞丹煙凌風振
桂拖闥霧馳犀船况當玄元家嘗著道德篇上善可比水斯文叅
五千精靈若在此肯惡微波傳不擬爭滴瀝還應會淪漣出門後

飛箭合勢浮青天必有學真子鹿冠秋鶴顏如能輔余志日使疏
其源

賦得三峽流泉歌

李季蘭

妾家本住巫山雲巫山流水常自聞玉琴奏出轉寒更直似當時
夢中聽三峽迢迢幾千里一時流入幽闈裏巨石崩崖指下生飛
波遠浪弦中起初疑噴怒含雷風復似嗚咽流不通迴湍曲瀨意
將盡時復滴瀝平沙中憶昔阮公爲此曲能使仲容聽不足一彈
既畢還一彈願比流泉鎮相續

明冰篇

富嘉謨

北陸蒼茫河海凝南山闌干晝夜冰素彩峩峩明月升深山窮谷
不自見安知採斲備嘉薦陰房固冱掩寒扇陽春二月朝始暎春
光潭沲度千門明冰時出御至尊彤庭赫赫九儀備署玉煌煌千
官事明冰畢歲周在位憶昔沙朔寒風漲崑崙長河冰始壯漫汗
峻嶒積亭障邕邕鳴鴈江上來禁苑池臺冰復開搖春涵綠映樓

臺函歌七月王風始明冰藏用照物軌四時不忒千萬祀

殿前曲

王昌齡

貴人粧梳殿前催香風吹入殿後來仗引笙歌大宛馬白蓮花發
照池臺

西施篇

王維

豔色天下重西施寧久微朝爲越溪女暮作吳宮妃賤日豈殊衆
貴來方悟稀邀人傳香粉不自著羅衣君寵益嬌態君憐無是非
當時浣紗伴莫得同車歸寄謝鄰家子效顰安可希

三閣詞

吳音四首

貴人三閣上日晏未梳頭不應有恨事嬌甚卻成愁
珠箔曲瓊鈎子細見楊州北兵那得渡浪語聲悠悠
沉香帖閣柱金縷畫門楣迴首降幡下已見黍離離
三人出智井一身登檻車朱門設臨水不得見鱸魚

霓裳羽衣曲

李肱

開元太平日萬國賀豐歲梨園厭舊曲玉座流新製鳳管遞參差
霞衣競搖曳宴罷水殿空輦餘春草細蓬壺事已久仙樂功無替
詎肯聽遺音聖明知善繼

遊仙十六首

道士吳筠

啓冊觀往載搖懷考今情終古已寂寂舉世何營營悟彼衆仙妙
超然含至精凝神契沖玄化服凌太清心同宇宙廣體合雲霞輕
翔風吹羽蓋慶霄拂霓旌龍駕朝紫微後天保令名豈如寰中士
軒冕矜暫榮

鸞鳳棲瑤林鷗鷺集平楚飲啄本殊好翱翔終異所吾方遺誼囂
立節慕高舉解茲區中戀結彼霄外侶誰謂天路遐感通自無阻
愍俗從遷謝尋仙去淪沒三元有真人與我生道骨凌晨吸丹景
入夜飲黃月百關彌調暢方寸益清越棲神合虛無洞覽周恍惚
不覺隨玉皇焚香詣金闕

西龜初定籙東華已校名三官無遺譴七祖昇雲輶體妙塵累隔

心微玄化并一朝出天地億載猶童嬰使我齊浩劫蕭蕭宴玉清
怡神在靈府皎皎含清澄仙經不吾欺輕舉信有徵疇昔希道念
而今果天矜豈非陰功著乃致白日昇焉用過洞府吾其越朱陵
高真誠寥邈道合不我遺孰謂姑射遠神人可同嬉結駕從之遊
飄飄出天垂不理人自化神凝物無疵因知至精感足以和四時
八海廣無際三山高不極金臺羅中天羽客恣遊息霞液朝可飲
虹芝晚堪食嘯歌自忘心騰舉寧假翼保壽同三光安能幾千億
將過大帝宮暫詣扶桑處真童已相迓爲我清宿霧海若寧洪濤
羲和止奔馭五雲結層閣八景動飛輿青霞正可挹丹椹時一遇
留我宴玉堂歸軒不令遽

欲趨洞陽界試覽丹極表赤帝躍火龍炎官控朱鳥導我昇絳府
長驅出天杪陽靈赫重暉四達何皎皎爲爾流飄風羣生遂無天
予因詣金母飛蓋超西極遂入素中天停輪太濛側若華拂流影
不使白日匿傾曦復亭午六合無暝色道化隨感遷此理誰能測

九龍何蜿蜿載我昇雲網臨睨懷舊國風塵混蒼茫依依遠人寰
去去邇帝鄉上超星辰紀下視日月光倏已過太微天居煥煌煌
停驂太儀側整服金闕前肅肅承上帝鏘鏘會羣仙鴻鑪發靈香
廣廡張鈞天王醴洽中座霞膏充四筵良期無終極俛仰移億年
峻朗妙門闢澄微真鑿通瓊林九霞上金閣三天中飛蚪躍慶雲
翔鶴搏靈風鬱彼玉京會仙期六合同

予昇至陽源欲憇明霞館飄飄瓊輪舉曄曄金景散結虛成萬有
高妙咸可翫玉山鬱嵯峨琅海杳無岸整賞過千椿遐齡誰復筭
招攜紫陽友合宴玉清臺排景羽衣振浮空雲駕來靈旛七曜動
瓊障九光開鳳舞龍璫奏蚪軒殊未迴

高昇紫極上宴此玄都岑玉蕊散奇香瓊珂流雅音靈風生太漠
習習吹人襟體混希微廣神凝空洞深蕭然宇宙外自得乾坤心

上元夫人詩

李白

上元誰夫人偏得王母嬌嵯峨三角髻餘髮散垂腰裘披青色錦

身著赤霜袍手提羸女兒閑與鳳吹簫眉語兩自笑忽然隨風飄

王子喬

宋之問

王子喬愛神仙七月七日上賓天白虎搖瑟鳳吹笙乘騎雲氣喻日精喻日精長不歸遺廟今在而人非空望山頭草草露濕君衣

玉真仙人詞

李白

玉真之真人時往太華峯清晨鳴天鼓颺歛騰雙龍弄霓不輟手行雲本無蹤幾時人少廣王母應相逢

夢太白西峯

常建

夢寐昇九崖杳靄逢元君貴我太白岑寥寥辭垢氛結宇在星漢宴林閑氛氳簷楹覆餘翠巾舄生片雲時往溪谷間孤亭晝仍曛松峯引天影石瀨清霞文括日緩舟趣霽心投鳥羣春風又搖擢潭島花紛紛

苦篁調笑引

李賀

請說軒轅在時事伶倫采竹二十四伶倫采之自崑丘軒轅以之

調元氣當時黃帝上天時二十三管咸相隨唯留一管人間吹無
德不能得此管此管沉埋虞舜祠

少室山韋鍊師昇仙歌

皇甫冉

紅霞紫氣甚氤氳絳節青童迎少君忽從林下昇天去空使時人
禮白雲

宿青牛谷梁鍊師仙居

楊衡

隨雲步入青牛谷青牛道士留我宿可憐夜久月明中唯有壇邊
一枝竹

玄都壇歌寄元逸人

杜甫

故人昔隱東蒙峯已佩含景蒼精龍故人今居子午谷獨在陰崖
結茅屋屋前太古玄都壇青石漠漠松風寒子規夜啼山竹裂王
母晝下雲旗翻知君此計誠長往芝草琅玕日應長鐵鎖高垂不
可攀致身福地何蕭爽

寄全椒山中道士

韋應物

今朝郡齋冷忽念山中客澗底束荆薪歸來煮白石欲持一瓢酒
遠慰風雨夕落葉遍空山何處尋行跡

洗心

道士司馬退之

不踐名利道始覺塵土腥不味稻粱食始覺神骨清羅浮奔走外
日月無短明山瘦松亦勁鶴老飛更輕逍遙此中容翠髮皆長生
草木多古色雞犬無新聲君有出俗志不貪英雄名傲然脫冠帶
改換人間情去矣丹霄步向曉雲冥冥

齋心

王昌齡

女蘿覆石壁溪水幽濛瀟紫葛蔓黃花娟娟寒露中朝飲花上露
夜卧松下風雲英化爲木光彩與我同日月蕩精魂寥寥天府空

寄菖蒲

張籍

石上生菖蒲一寸十二節仙人勸我食令我頭青面如雪逢人寄
君一絳囊書中不得傳此方君能來作棲霞侶與君同入丹玄鄉

金璫玉珮歌

顧況

贈君金璫太霄之玉珮金鎖禹步之流珠五嶽真君之祕籙九天
丈人之寶書東井沐浴辰巳畢先進洞房上奔日借問君從何處
來黃姑織女機邊出

重校正唐文粹卷第十七之下



童林五惠文粹
 來黃故論文林
 大人之寶書東共
 觀錄全錄大書之
 正府金鑑萬世之
 本規正誠真錄之
 好錄天大

重校正唐文粹卷第十八

吳興姚

鉞

纂

詩十 摠一百三十六首

古調歌篇九

感寓五十

感寓詩三十八首

陳子昂

感寓七首

張九齡

感寓 權德輿

效陳拾遺感寓二首

司空圖

古意二首 孫郈

詠史二十一

詠史十一 李華

詠史 高適

詠史二首

釋皎然

詠史二首 劉禹錫

詠史四首 盧照鄰

讀李斯傳 曹鄴

慨嘆三十五

出關作 魏徵

隴右途中遭非語

貞半千

書懷 劉幽求

自紀 皇甫松

贈友人

呂溫

贈韓愈二首 孟郊 贈喬林 劉昫 寄唐生 白居易

華下司空圖 姚合 傷時二首 孟雲卿 封丘作 高適

街西居三首 姚合 效陳拾遺子昂 司空圖

感時 張說 夜坐 張說 無可奈何歌 白居易

逢白公 元稹 感懷 費冠卿 贈崔純亮 孟郊

客喜 賈島 有所思 宋之問 秦人謠 古之奇

時興 楊賁 聞砧有感 呂溫 野田行 于鵠

贈馮宿 李觀 偶然作二首 呂溫 及第後答潼關主人

朝飢 賈島 九日酬顧少府 高適

感物十六

觀玉篇 陳子昂 素絲 陸龜蒙 李都尉古劍 白居易

廢琴 張籍 廢瑟詞 張籍 說劍 元稹

春桂問答二首 王績 養鷲詞 劉禹錫 對菊 賈島

直鉤吟 盧仝 競渡 元稹 見牧牛人擔青草 張說

道州觀野火 呂溫 諭寶二首 元稹

春感八

送春曲三首 劉禹錫

衡州春早二首 呂溫

尋人偶題 邵真 題花樹 楊衡

惜花 陸龜蒙

秋感六

秋日 耿緯

秋夕懷遠 孟郊

蟋蟀詩 羅隱

秋思 司空圖

在郡秋懷二首 張九齡

感寓詩三十八首

陳子昂

微月生西海幽陽始化昇圓光正東滿陰魄已朝凝太極生天地

三元更廢興至精諒斯在三五誰能徵

蘭若生春夏苒蔚何青青幽獨空林色朱蕤冒紫莖遲遲白日晚

嫋嫋秋風生歲華盡搖落芳意竟何成

蒼蒼丁零塞今古緬荒途亭堠何摧兀暴骨無全軀黃沙莫南起

白日隱西隅漢甲三十萬曾以事匈奴但見沙場死誰憐塞上孤

樂羊爲魏將食子殉軍功骨肉且相薄他人安得忠吾聞山中相
乃屬放麕翁孤獸猶不忍况以奉君終

市人矜巧智於道若童蒙傾奪相夸侈不知身所終曷見玄真子
觀世玉壺中杳然遺天地乘化入無窮

吾觀龍變化乃知至陽精石林何冥密幽洞無留行古之得仙道
信與元化并玄感非象識誰能測淪冥世人拘目見酣酒笑丹經
崑崙有瑤樹安得采其英

白日每不歸青陽時暮矣茫茫吾何思林卧觀無始衆芳委時晦
鷓鴣悲鳴耳鴻荒古已頽誰識巢居子

吾觀崑崙化日月淪洞冥精魄相交構天壤以羅生仲尼推太極
老聃貴窈冥西方金仙子崇議乃無明空色皆寂滅業緣定何成
名教信紛籍死生俱未停

聖人祕元命懼世亂其真如何嵩公輩詆譎誤時人先天誠爲美
階亂禍誰因長城備胡寇羸禍發其親赤精旣迷漢子年何救秦

云去桃李花多言死如麻

深居觀元化悱然爭朶頤羣動相啖食利害紛凝凝便便夸毗子
榮耀更相持務光讓天下商賈競刀錐已矣行采芝萬世同一時
吾愛鬼谷子青谿無垢氛囊括經世道遺身在白雲七雄方龍鬪
天下又無君浮榮不足貴導養晦時文舒可彌宇宙卷之不盈分
豈徒山木壽空與麋鹿群

呦呦南山鹿離罟以媒和招搖青桂樹幽蠹亦成科世情甘近習
榮耀紛如何怨憎未相復親愛生禍羅瑤臺傾巧笑玉杯殞雙蛾
誰見孤城樹青青成斧柯

林居病時又水木澹孤清閑卧觀物化悠悠念無生青春始萌達
朱火已滿羸殂落方自此感歎何時平

臨歧泣世道天命良悠悠昔日殷王子玉馬遂朝周寶鼎淪伊穀
瑤臺成故丘西山傷遺老東陵有故侯

貴人難得意賞愛在須臾莫以心如玉採他明月珠昔稱天桃子

今爲春市徒鴟鴞悲東國麋鹿泣姑蘇誰見鴟夷子扁舟去五湖
聖人去已久公道緬良難蚩蚩夸毗子堯禹以爲謾驕榮貴工巧
勢利遞相干燕王尊樂毅分國願同歡魯連讓齊爵遺組去邯鄲
伊人信往矣感激爲誰歎

幽居觀大運悠悠念羣生終古代興沒豪聖莫能爭三季淪周赧
七雄滅秦嬴復聞赤精子提劍入咸京炎光旣無象晉魯復縱橫
堯禹道已昧昏虐勢方行豈無當世雄天道與胡兵咄咄安可言
時醉而未醒仲尼溺東夏伯陽遁西溟大運自古來旅人胡歎哉
逶迤世已久骨鯁道斯窮豈無感激者時俗頽此風灌園何其鄙
皎皎於陵子世道不相容嗟嗟張長公

聖人不利已憂濟在元元黃屋非堯意瑤臺安可論吾聞西方化
清淨道彌敦奈何窮金玉彫刻以爲尊雲構山林盡瑤圖珠翠煩
鬼功尚未可人力安能存夸愚適增累矜智道逾昏

玄天幽且默羣議曷咄咄聖人教猶在世運久陵遲一繩將何繫

憂醉不能持去去行采芝勿爲塵所欺

蜻蛉遊天下與世本無患飛飛未能止黃雀來相干穰侯富秦寵
金石比交歡出入咸陽裏諸侯莫敢言寧知山東客激怒秦王肝
布衣取丞相千載爲辛酸

微霜知歲晏斧柯始青青況乃金天夕浩露霑羣英登山望宇宙
白日已西溟雲海方蕩瀟孤鱗安得寧

翡翠巢南海雄雌珠樹林何如美人意驕愛比黃金殺身炎洲裏
委羽玉堂陰旖旎光首飾歲蕤爛錦衾豈不在遐遠虞羅忽見尋
多材信爲累歎息此珍禽

挈瓶者誰子妖服當青春三五明月滿盈盈不自珍高堂委金玉
微縷懸千鈞如何負公鼎被奪笑時人

玄蟬號白露茲歲已蹉跎羣物從大化孤英將奈何瑤臺有青鳥
遠食玉山禾崑崙見玄鳳豈復虞雲羅

荒哉穆天子好與白雲期宮女多怨曠層城閉蛾眉日耽瑤臺樂

豈傷桃李時青苔空萎絕白髮生羅帷

朝發宜都渚浩然思故鄉故鄉不可見但見巫山陽巫山彩雲沒
高丘正微茫佇立望已久涕淚霑衣裳豈茲越鄉感憶昔楚襄王
朝雲無處所荆國亦淪亡

昔日章華宴荆王樂荒淫霓旌翠羽蓋射光雲夢林竭來高堂觀
悵望陽雲岑雄圖今何在黃雀空哀吟

丁亥歲云暮西山事甲兵羸糧市邛道荷戟爭羌城嚴冬陰風勁
窮岫油雲生昏黷無晝夜羽檄復相驚攀躅兢萬仞崩危遠九冥
藉藉峯壑裏哀哀冰雪行聖人御宇宙聞道太階平肉食謀何失
葵藿緬縱橫

可惜瑤臺樹灼灼佳人姿碧華映朱實攀折青春時豈不盛光寵
榮君白玉墀但恨紅芳歇凋傷感所思

竭來豪遊子勢利禍之門如何蘭膏歎感激自生怨衆趨明所避
時棄道猶存雲泉既已失羅網與誰論箕山有高節湘水有清源

唯應白鷗鳥可爲洗心言

素居獨幾日炎夏忽然衰陽彩皆陰翳親友盡睽違登山望不見
涕泣久漣漣宿夢感顏色若與白雲期世中驕豪子驅逐正嗤嗤
蜀山與楚水攜手在何時

金鼎合神丹世人將見欺飛飛騎羊子胡乃在蛾眉變化固幽類
芳菲能幾時疲痾苦淪世憂瘴日侵溜眷然顧幽褐白雲空涕洟
朔風吹海樹蕭條邊已秋亭上誰家子哀哀明月樓自言陰燕客
結髮事遠遊赤丸殺公吏白刃報私讎避仇至海上被役此邊州
胡鄉三千里遼水復悠悠每憤胡兵入常爲中國羞何知七十載
白首未封侯

本爲貴公子平生實愛才感時思報國拔劍起蒿萊西馳丁令塞
北上單于臺登山見千里懷古心悠哉誰言未忘禍磨沒成塵埃
浩然坐何暮吾蜀有蛾眉念與楚狂子悠悠白雲期時哉悲不會
涕泣久漣漣夢登綏山穴南采巫江芝探元觀竒化遺世從雲螭

婉孌將未矣感悟不見之

朝入雲中郡北望單于臺胡秦何密邇沙朔氣雄哉藉藉天驕子
猖狂已復來塞垣無名將亭堠空崔嵬咄嗟吾何歎邊人塗草萊
仲尼探元化幽鴻順陽和大運自盈縮春秋遞來過盲飈忽號怒
萬物相紛劇溟海皆震蕩孤鳳其如何

感寓七首

張九齡

蘭葉春歲蕤桂華秋皎絜欣欣此生意自爾爲佳節誰知林棲者
聞風坐相悅草木有本心何求美人折
幽林歸獨卧滯慮洗孤清持此謝高鳥因之傳遠情日夕懷空意
人誰感至精飛沉理自隔何所慰吾誠

魚遊樂深池鳥棲欲高枝嗟爾蜉蝣羽薨薨亦何爲有生豈不化
所感奚若斯神理日微滅吾心安得知浩歎楊朱子徒然泣路岐
孤鴻海上來池潢不敢顧側見雙翠鳥巢在三珠樹矯矯珍木巔
得無金丸懼美服患人指高明逼神惡今我遊冥冥弋者何所慕

吳越數千里夢寐今夕見形骸非我親衾枕即鄉縣化蝶猶不識
川魚安可羨海上有仙山歸期覽神變

抱影吟中夜誰聞此歎息美人適異方庭樹銜幽色白雲愁不見
滄海飛無翼鳳凰一朝來竹花此可食

漢上有游女求思安可得袖中一書札欲寄雙飛翼冥冥獨不見
耿耿徒緘憶紫蘭秀空蹊皓露奪幽色馨香歲欲晚感歎情何極
白雲在南山日暮長太息

感寓

權德輿

殘雨倦欹枕病中時序分秋蟲與秋葉一夜隔窻聞虛室對搖落
晤言無與羣冥心試觀化世故如絲棼但看鳶戾天豈見山出雲
下俚徒擊節朱絃祕南薰倚梧秀朝陽上有威鳳文終待九成奏
來儀瑞吾君

效陳拾遺子昂感寓二首

司空圖

高燕飛何捷啄害恣羣鷄人豈玩其暴華軒容爾居強欺自天稟

剛吐信吾徒乃知不平者矯世道終孤
陽和含煦潤卉木競紛華當爲衆所悅私已汝何誇北里祕穠豔
東園鎖名花豪奪乃常理笑君徒咄嗟

古意二首

擬梓州陳拾遺

孫郅

屈子生楚國七雄知其材介絜世不容跡合藏蒿萊道廢固命也
瓢飲亦賢哉何事葬江魚空使後人哀
魏禮段干木秦王乃止戈小國有其人大國奈之何賢哲信爲美
兵甲豈云多君子戰必勝斯言聞孟軻

詠史十一首

李華

日照崑崙上羽人披羽衣乘龍駕雲霧欲往心無違此山在西北
乃是神仙國靈氣皆自然求之不可得何爲漢武帝精意徧羣山
糜費巨萬計宮車終不還蒼蒼茂陵樹足以戒人間
天生忠與義本以佐雍熙何意李司隸而當昏亂時古墳襄城野
斜徑橫秋陂况不禁樵採茅莎無子遺高標尚可仰精爽今何之

一忤中常侍銜寃誰見知常觀黨錮傳撫卷不勝悲

文侯耽鄭衛一聽一忘殮白雪燕姬舞朱絃趙女彈淫聲流不返
怕蕩日無端獻歲受朝時鳴鐘醮百官兩牀陳管磬九奏殊未闌
對此唯恐卧更能整衣冠

漢皇脩雅樂乘輿臨太學三老與五更天王親割牲一人調風俗
萬國和且平單于驟款塞武庫欲銷兵文物此朝盛君臣何穆清
至今墳壇下如有簫韶聲

蜀主相諸葛功高名亦尊驅馳十萬衆怒目瞰中原曹伯任公孫
國忘身不存社宮又蕪沒白鴈猶飛翻勿言君臣合可以濟黎元
爲蜀諒不易如曹難復論

秦滅漢帝興南山有遺老危冠揖萬乘幸得厭征討當君逐鹿時
臣等已枯槁寧知市朝變但覺泉石好高卧三十年相看成四皓
帝言翁甚善見顧何不早咸稱太子仁重義亦尊道側聞驪姬事
申生不自保暫出商山雲謁來趨灑掃東宮成羽翼楚舞傷懷抱

後代無其人戾園滿秋草

六國韓最弱末年尤畏秦鄭生爲韓計且欲疲秦人利物可分社
原情堪滅身咸陽古城下萬頃稻苗新

昂藏獬豸獸出自太平年亂代乃潛伏縱人爲禍愆常聞斷馬劍
每壯朱雲賢身死名不滅塞風吹墓田精靈如有在幽憤滿松煙
沂水春可涉泮宮映楊葉麗色異人間珊珊搖珮環展禽恒獨處
深巷生禾黍城上飛海雲城中暗春雨適來鳴珮者復是誰家女
泥沾珠綴履雨濕翠毛簪電影閉蓮臉雷聲飛蕙心自言沂水曲
采蘋兼采菜歸逕雖可尋天陰光景促憐君貞且獨願許君家宿
徒勞惜衾枕子不顧雙蛾豔質誠可重淫風如禮何周王惑褒姒
城闕成陂池

巢許在嵩嶺陶唐不得臣九州上洗耳一命安能親縣邈數千祀
丘中誰隱淪朝遊公卿府夕是山林人蒲帛楊仄陋薜蘿爲搢紳
九重念入夢三事思降神且設庭中燎寧窺泉下鱗

漢時征百越楊僕將樓船幕府功未立江湖已騷然島夷非敢亂
政暴地仍偏得罪因懷璧防身輒控弦三軍求裂土萬里詎聞天
魏闕心猶在旗門首已懸如何得良吏一爲制方圓

詠史一首

尚有綈袍贈應憐范叔寒不知天下士猶作布衣看

詠史二首

釋皎然

田氏門下客馮公衆中賤一朝市義還百代名獨擅始知下客不
可輕能使主人功業成借問高車與珠履何如庇賤一書生
獨負高世姿冥冥寄浮俗卞子去不歸何人識荆玉鬻春意不淺
汚跡身豈辱鸞鍛樂迤邐蚪蟠甘窘束五噫譎且正可以見心曲

詠史二首

劉禹錫

驃騎非無勢少卿終不去世道劇頽波我心如砥柱
賈生明王道衛綰工車戲同遇漢文時何人居貴位

詠史四首

盧照鄰

昔有平陵男姓朱名阿游直髮上衝冠壯氣橫三秋願得斬馬劍
先斷佞臣頭天子玉檻折將軍丹血流捐生不肯拜視死其若休
歸來教鄉里童蒙遠相求弟子數百人散在十二州三公不敢吏
五鹿何能誚名與日月懸義與天壤儔何必疲執戟區區在封侯
偉哉曠達士知命固不憂

季生昔未達身辱功不成髡鉗爲臺隸灌園變姓名幸逢滕將軍
兼遇曹丘生漢祖廣招納一朝拜公卿百金孰云重一諾良匪輕
廷議斬樊噲羣公寂無聲處身孤且直遭時坦而平丈夫當如此
唯唯何足榮

大漢昔云季小人道遂振玉帛委閭尹斧鑕嬰摺紳邈哉郭先生
卷舒得其真雍容謝朝廷譚笑弊人倫在晦不絕俗處亂不爲親
諸侯不得友天子不得臣冲情甄負甌重價折角巾悠悠天下士
相送洛橋津誰知仙舟上寂寂無四鄰
公業負竒志交結盡才雄良田四百頃所食常不充一爲侍御史

慷慨說何公何公何爲敗吾謀適不同仲穎恣殘忍廢誠良在躬
死人如亂麻天子如轉蓬干戈及黃屋荆棘生紫宮鄭生運其謀
將以清國戎時來命不遂脫身歸山東凜凜千載下穆然懷清風

讀李斯傳

曹鄴

欺暗常不然欺明當自戮難將一人手掩得天下目

出關作

魏徵

中原初逐鹿投筆事戎軒縱橫計不就慷慨志猶存杖策謁天子
驅馬出關門請纓繫南越憑軾下東蕃鬱紆陟高岫出沒望平原
古木吟寒鳥空山啼夜猿旣傷千里目還驚久逝魂豈不憚艱險
深懷國士恩季布無二諾侯嬴重一言人生感意氣功名誰復論

隴右途中遭非語

貞半干

趙有兩毛遂魯聞二曾參慈母猶且惑况在行路心冠冕無醜士
賄賂成知己名利我所無清濁誰見理弊服空庭春緩帶不著身
出遊非懷璧何憂乎忌人正須自保愛振衣在生塵

書懷

劉幽求

心爲明時盡君門尚不容田園迷徑路歸去欲何從

自紀

皇甫松

皇天后地力使我向此生貴賤不我均若爲天地情我家世道德
旨意匡文明家集四百卷獨立天地經寄言青松姿豈羨朱槿榮
昭昭大化光共此遺芳馨

贈友人

呂溫

南山雙喬松擢本皆千尋夕流膏露津朝被青雲陰負雪出深澗
搖風倚高岑明堂久不構雲榦何森森匠意方雕巧時情正誇淫
生材會有用天地豈無心

贈韓愈二首

孟郊

何以定交契贈君高山石何以保貞妍贈君青松色貧交過此外
無可相彩飾更有其鼠詩吟之堪淚滴其鼠旣穿墉又齧機上綵
穿墉有閑土齧機無餘絲朝吟枯桑柘暮泣空杼機豈是無巧妙

絲斷將何施衆人尚肥華志士多飢羸願君保此節天意當察微
前日遠別離今日生白髮欲知萬里情曉卧半牀月常恐百蟲秋
使我芳草歇

贈喬林

劉昫虛

去年上策不見收今年寄食仍淹留羨君有酒能便醉羨君無錢
能不憂如今五侯不待客羨君不問五侯宅如今七貴方自尊羨
君不過七貴門丈夫會應有知己世上悠悠何足論

寄唐生

白居易

賈誼哭時事阮籍哭路岐唐生今亦哭異代同其悲唐生者何人
五十寒且飢不悲口無食不悲身無衣所悲忠與義悲甚則哭之
太尉擊賊日段太尉此以尚書叱盜時李希烈大夫死兇寇陸大
飢楊諫議左每見如此事聲發涕輒隨往往聞其
風俗士猶或非憐君頭半白其志竟不衰我亦君之徒鬱鬱何所
為不能發聲哭轉作樂府詩篇篇無空文句句必盡規切過虞人

箴痛甚騷人詞非求宮律高不務文字奇惟歌生民病願得天子
知未得天子知甘受時人嗤藥良氣味苦瑟淡音聲希不懼權豪
怒亦任親朋譏人竟無奈何呼作狂男兒每逢羣動息或遇雲霧
披但自高聲歌庶幾天聽早歌哭雖異名所感則同歸寄君三十
章與君爲哭詞

華下

司空圖

日炙旱雲裂迸爲千道血天地沸一鑊竟自烹妖孽堯湯遇災數
災數還中輟何事奸與邪古來難撲滅

傷時二首

孟雲卿

徘徊宋郊上不見平生親獨立正傷心悲風來孟津大方載群物
生死有常倫虎豹不相食哀哉人食人豈知逢世運天道亮云云
太虛流素月三五何皎明光曜侵白日賢愚迷至精四時更變化
大道有虧盈常恐今已沒須臾復更生

封丘作

高適

我本漁樵孟諸野一生自是悠悠者乍可狂歌草澤中寧堪作吏
風塵下祇言小邑無所爲公門百事皆有期拜迎官長心欲碎鞭
撻黎庶令人悲悲來向家問妻子本家盡道今如此生事應須南
畝田世情付與東流水夢想舊山安在哉爲銜君命且遲迴乃知
梅福徒爲爾卻憶陶潛歸去來

街西居三首

姚合

受得山野性任成多事違青山在宅南迴首東西睇淺淺一井泉
數家共汲之獨我惡水濁鑿井庭之陞自鑿還自飲亦爲衆所非
吁嗟世間事繫身誠難爲

日出窮巷喜溫然勝重衣重衣豈不暖暖氣人不齊兀兀復行行
不離階與墀

丈夫非馬蹄安得知路岐窮賤飡茹薄興與養性宜乃知長生術
豪貴難得之

效陳拾遺子昂

司空圖

醜婦競簪花花多映愈醜鄰女恃其姿撥之不盈手量已苟自私
招損乃誰咎寵祿既非安於吾竟何有

感時

好鳥無惡聲仁獸肯狂噬寧教鸚鵡啞不遣麒麟細人人語與默
唯觀利與勢愛毀亦自遭掩諉終失計

夜坐

張說

懷哉四壁時未有五都價百金誰見許斗酒難爲貴落花生芳春
孤月皎清夜復逢利交客題戶遙相謝

無可奈何歌

白居易

無可奈何兮白日走而朱顏頹少日往兮老日催生者不住兮死
者不迴况乎寵辱豐頹之外物又何嘗不一去而一來去不可挽
兮來不可推無可奈何兮已焉哉惟天長而地久前無始兮後無
終嗟吾生之幾何寄瞬息乎其中又如太倉之稊米委一粒於萬
鍾何不與道逍遙委化從容縱心放志洩洩融融胡爲乎分愛惡

於生死繫憂喜於窮通倔强其骨髓齟齬其心曾合冰炭以交戰
祇自苦平厥躬彼造物者于何不爲此與化者云何不隨或煦或
吹或盛或衰雖千變與萬化委一順以貫之爲彼何非爲此何是
誰冥此心夢蝶之子何禍非福何吉非凶誰達此觀喪馬之翁俾
吾爲秋毫之杪吾亦自足不見其小俾吾爲泰山之阿吾亦無餘
不見其多是以達人靜則肫然與陰合迹動則浩然與陽同波委
順而已孰知其他時耶命耶吾其無奈彼何委邪順邪彼亦無奈
吾何夫兩無可奈何然後能冥至順而合大和故吾所以飲大和
扣至順而爲無可奈何之歌

逢白公

元稹

遠路事無限相逢唯一言月色照榮辱長安千萬門

感懷

費冠卿

螢燭不爲苦求名始辛酸上國無交親請謁多少難九月風割面
羞汗成冰片求名俟公道名與公道遠力盡得一名他喜我且輕

家書十年絕歸去知誰榮馬嘶渭河柳特地起愁聲

贈崔純亮

孟郊

食齋腸亦苦強歌聲無歡出門即有礙誰謂天地寬有礙非遐方
長安大道傍小人智慮險平地生太行鏡破不改光蘭死不改香
始知君子交久久道益彰君心與我懷離別俱惘惶譬如浸蘗泉
流苦日已長忍泣目易衰忍憂形易傷項籍豈非壯賈生豈非良
當其失意時涕泗各滿裳古人勸加食此食難自強一飯九祝噎
一嗟十斷腸况非兒女冤冤氣凌彼蒼彼蒼若有知白日下清霜
今朝始驚呼碧落空茫茫

客喜

賈島

客喜非實喜客悲非實悲百迴信到家未當身一歸未歸長愁嗟
愁嗟填中懷開口吐愁聲還卻入耳來嘗恐滴淚多自損兩目輝
鬢邊雖有絲不堪織寒衣

有所思

宋之問

洛陽城東桃李花飛來飛去落誰家幽閨兒女惜顏色坐見落花
長歎息今年花落顏色改明年花開復誰在已見松柏摧為薪更
聞桑田變成海古人無復洛城東今人還對落花風年年歲歲花
相似歲歲年年人不同寄言全盛紅顏子須憐半死白頭翁此翁
白頭真可憐伊昔紅顏美少年公子王孫芳樹下清歌妙舞落花
前光祿池臺文錦繡將軍樓閣畫神仙一朝卧病無相識三春行
樂在誰邊婉轉蛾眉能幾時須臾鶴髮亂如絲但看古來歌舞地
唯有黃昏鳥雀飛

秦人謠

古之奇

微生祖龍代卻思堯舜道何人仕帝庭拔殺指佞草姦臣弄民柄
天子恣衷抱上下一相蒙馬鹿遂顛倒中國既版蕩骨肉安可保
人生貴年壽吾恨死不早

時興

楊貴

貴人昔未貴咸願顧寒微及自登樞要何曾問布衣平明登紫閣

日晏下彤闈擾擾路傍子無勞歌是非

聞磴有感

呂溫

千門儼雲端此地富羅紈秋月三五夜磴聲滿長安幽人感中懷
靜聽淚汎瀾所恨搗衣者不知天下寒

野田行

于鵠

日没出古城野田何茫茫寒狐上孤冢鬼火燒白楊昔人未為泉
下客若到此中還斷腸

贈馮宿

李觀

寒晨上秦原遊子衣飄飄黑雲截萬里獵火從中燒陰空蒸長煙
殺氣獨不銷冰交石可裂風疾山如搖時無青松心顧我獨不凋

偶然作二首

呂溫

棲棲復汲汲忽覺年四十今朝滿衣淚不是傷春泣
中夜兀然坐無言空涕洟丈夫志氣事兒女安得知

及第後答潼關主人

本欲雲雨化却隨波浪翻一露太常第十過潼關門志力且虛棄
功名誰復論主人固相問慙笑不能言

朝飢

賈島

市中有樵山此舍朝無煙井底有甘泉釜中乃空然我要見白日
雪來塞青天立聞西牀琴凍折兩三弦飢莫詣他門古人有拙言

九日詠顧少府

高適

簷前白日應可惜籬下黃花爲誰有客子迎霜未授衣主人得錢
肯酤酒蘇秦憔悴時多厭蔡澤棲遲世看醜縱使登高祗斷腸不
如獨坐空搔首

觀玉篇 并序

陳子昂

丙戌歲余從左補闕喬公北征夏四月軍幕舍于張掖河河洲草
木無他異者唯有仙人杖往往叢生幽朔地寒與中國頗異余家
世好服食昔嘗餌之及此役也而息意茲味戍人有薦嘉蔬者此
物存焉余倏爾而笑曰始者與此君別不圖至是而見之豈非神

明嘉惠將欲扶吾壽也。因爲喬公昌言其能，特東萊王仲烈亦同旅舍聞而大喜，甘心食之，已旬有五日矣。適有行人自謂知藥者，謂喬公曰：「此白棘也，公何謬哉？」仲烈愕然而疑，亦曰：「吾怪其味甜，今果如此。」喬公信是言，乃譏余作采玉篇，謂宋人不識玉而寶珉石也。余心知必是由以獨見之故，被奪於衆人，乃喟然而嘆曰：「嗟乎！人之大明者目也，心之至信者口也。夫目照五色，口分五味，玄黃甘苦亦可斷而不惑矣。而路傍一議，二子增疑，况君臣之間，朋友之際乎？自是而觀之，則萬物之情可見也。感采玉詠而作觀玉篇，以荅之，并示仲烈，譏其失真。」

鴟夷雙白玉，此玉有緇磷。懸之千金價，舉世莫知真。丹青非異色，輕重有殊倫。勿信王工言，徒悲荆國人。

素絲

陸龜蒙

園客麗獨繭，詩人吟五綬。如何墨子淚，反以悲途窮。我意豈於是，願參天地功。爲綫補君袞，爲絃繫君桐。左右修闕職，宮商還古風。

端然潔白心可與神明通

李都尉古劍

白居易

古劍寒黯黯鑄來幾千秋白光納日月紫氣排斗牛有客借一觀
愛之不敢求湛然玉匣中秋水澄不流至寶有本性精剛無與儔
可使寸寸折不能繞指柔願快直士心將斷佞臣頭不願報小怨
夜半刺私讎勸君慎所用無作神兵羞

廢琴

絲桐合為琴中有太古聲古聲淡無味不稱今人情玉徽光彩滅
朱弦塵土生廢棄來已久遺音尚泠泠不辭為君彈縱彈人不聽
何物使之然羌笛與秦箏

廢瑟詞

張籍

古瑟在匣誰復識玉柱顛倒朱絲黑千年曲譜不分明樂府無人
傳正聲秋蟲暗穿塵作色腹中不辨工人名幾時天下復古樂此
瑟還奏雲門曲

說劍

元稹

吾友有寶劍密之如密友我寶膠漆交中堂共杯酒酒酣肝膽露
恨不眼前剖高唱荆卿歌亂擊相如缶更擊復更唱更酌亦更壽
白虹座上飛青蛇匣中吼我聞音響異疑是干將偶爲君再拜言
神物可見不君言亦可見復言我自取匣已焚香近鞘先澤手
徐抽寸寸刃漸屈彎彎肘殺殺霜在鋒團團月臨鈕逡巡潛虬躍
鬱律驚左右霆雷滿室光蛟龍繞身走我爲捧之泣此劍別來久
鑄時堇山破藏在松桂朽幽匣獄邊埋神人水心守本用稽泥淬
果非雷煥有我欲評劍功願君良聽受劍可割犀兕劍可切瓊玖
劍決天外雲劍衝日中斗劍墮妖蛇腹劍拂佞臣首太古初斷鼈
武王親擊紂燕丹卷地圖陳平綰花綬曾被挂樹枝寒光射林莽
曾經鑄農器利用翦稂莠神物終變化復爲龍牝牡晉末武庫燒
脫然排戶牖爲欲掃羣胡散作彌天帚自茲失所往豪英共爲詬
今復誰人鑄挺然千載後旣非古風胡無乃近鷗九自我與君遊

平生益自負况擎寶劔出重以雄心扣此劔何太奇此心何太厚
觀君慎所用所用無或苟潛將辟魑魅勿但防妾婦留斬泓下蛟
莫試街中狗君今困泥滓我亦空塵垢俗耳驚大言逢人少開口

春桂問荅二首

王績

問春桂桃李正芬華年光隨處滿何事獨無花
春桂荅春華詎能久風霜搖落時獨秀君知不

養鷲詞

并序

劉禹錫

途逢少年志在逐絕方呼鷹隼以襲飛走因縱觀之卒無所獲行
人有嘗從事於斯者曰夫鷲禽飢則爲用今哺之過篤故然也予
感之作養鷲詞

養鷲非玩形所資擊鮮力少年昧其理日日哺不息探鷲網黃口
日暮有餘食寧知下韝時翅重飛不得陪鰓止林表狡兔自南北
飲啄既已盈安能勞羽翼

對菊

賈島

九日不出門十日見黃菊灼灼尚繁英美人無消息

直鈎吟

盧仝

初歲學釣魚自謂魚易得三十持釣竿一魚釣不得人鈎曲我鈎直哀哉我鈎又無食文王已沒不復生直鈎之道何時行

競渡

元稹

吾觀競舟子因測大競源天地昔將競蓬敷晝夜昏龍蛇相噴薄
海岱俱崩奔群動皆攪撓化作流渾渾數極關心息大和承混元
一氣忽爲二轟然畫乾坤日月復照曜春秋遞寒溫八荒坦以曠
萬物羅亦繁聖人中間立理世了煩延縣縣復幾歲逮及義與軒
炎皇熾如炭蚩尤扇其燔有能競心起驅戰山林樊一戰波委焰
再戰火燎原戰訖天下定號之爲軒轅自是豈無競瑣細不復言
其次有龍競競渡龍之門龍門浚如瀉淙射不可援赤鱗化時至
擔突鬚鬣掀乘風瞥然去萬里黃河翻接瞬電延出微吟霹靂喧
傍瞻曠宇宙俯瞰卑崐崙庶類咸在下九霄行易捫倏辭蛙躡穴

遽排天帝闈迴悲暴鯁者未免鯨鯢吞帝命澤諸夏不棄蟲與昆
隨時布膏露稱物施厚恩草木霑我潤豚魚望我蕃嚮來同競輩
豈料由我存壯哉龍競渡一競身獨尊捨此皆蟻鬪競舟何足論

冬日見牧牛人擔青草歸

張說

塞上繇應折江南草可結欲持梅嶺花遠競榆關雪日月無他照
山川何頓別苟齊兩地心問天將安設

道州觀野火

呂溫

南風吹烈焰火焰燒楚澤陽景當晝連陰天半夜赤過處若彗掃
來時如電激豈復辨蕭蘭焉得分玉石蟲蛇盡爍爛虎兕亦奔迫
積穢一蕩除和氣始融液堯旻既敬授禹稼斯肇迹遍生合穎禾
大秀兩歧麥家有京坻詠人無溝壑感若悟焚如功來歲終受益

諭寶二首

元稹

沉玉在弱泥泥弱玉易沉扶桑寒日薄不照萬丈心安得潛淵虯
拔壑超鄧林泥封泰山陞水散旱天霖洗此泥下玉照曜臺殿深

刻爲傳國寶神器人不侵

水置白玉壺始見清皎絜珠穿殷紅縷始見明洞澈鑊錙無人淬
兩刃幽壤鐵春鏡無人拭一片埋霧月驥跼環堵中骨附筋入節
虯蟠尺澤內魚貫蛙同穴舩舩無巨海浮桴矜濊瀆棟梁無廣厦
顛倒卧霜雪大鵬無長空舉翮受羈紲豫章無厚地危柢真旣隳
圭璧無卞和甘與頑石列舜禹無陶堯名隨腐草滅神功伏神物
神物神乃別人神不世出所以神功絕神物豈徒然用之有施設
禹功九州理舜德天下悅璧充傳國璽圭用祈泰折干尋豫章幹
九萬大鵬歇棟梁庇生民舩舩濟來哲虯騰旱天雨驥騁流電掣
鏡懸姦膽露劒拂妖蛇裂珠生照乘光冰瑩環座熱此物比在泥
斯言爲誰發凡今盡凡耳不爲君不說

送春曲三首

劉禹錫

春向晚春晚思悠哉風雲日已故花葉自相摧漠漠空中去何時
天際來

春已暮
冉冉如人老
映葉見殘花
連天是青草
可憐桃與李
從此同桑棗

春竟去
此去何時迴
遊人千萬恨
落日高臺寂
寞繁華盡
流鶯歸不來

衡州早春二首

呂溫

碧水何逶迤
東風吹沙草
煙波千里曲
不辨嵩陽道
病肺不飲酒
傷心不看花
唯驚望鄉處
猶自隔長沙

尋人偶題

邵真

日晏不復午
落花難歸樹
人生能幾何
莫厭相逢遇

題花樹

楊衡

都無看花意
偶到樹邊來
可憐枝上色
一一爲愁開

惜花

陸龜蒙

人壽期滿
百花开唯
一春其間
風雨至旦
夕旋爲塵
若使花解
愁愁於看
花人

秋日

耿緯

返照入閭巷憂來與誰語古道無人行秋風動禾黍

秋夕懷遠

孟郊

卧冷無遠夢聽秋酸別情高枝低枝風千葉萬葉聲淺井不供飲
瘦田長廢耕今交非古交貧語聞皆輕

蟋蟀詩

羅隱

頑颯斃芳吹愁夕長層成有動歌離弔夢如訴如言緒引虛寬周
隙伺榻繁咽蝻綠范睡蟬老冠峨綉好不冠不綉爾奚以悲蚊蚋
有毒食人肌肉蒼蠅多端黑白偷安爾也出處物兮莫累壤舍啼
衰虛堂泣署勿徇誼謹鼠豈無牙勿學叢菲垣亦有耳危條槁飛
抽恨咿咿別帳缸冷柔魂不定美人在何夜影流波與子佇立徘徊
思多

秋思

司空圖

身病時亦危逢秋多慟哭風波一搖蕩天地幾翻覆孤螢出荒池



浙江圖書館善本

甲 登記號:022979

一九 年 月 日



卷十六至十八詩
王起至十三



